



增補甘泉縣志

函叁拾

ル 5
3144
13



門 儿 5
3144
卷 13

增修甘泉縣志卷十四

甘泉縣知縣吳鄂峙 張宏運 王熙泰 原纂

甘泉縣知縣陳觀國 揚州府教授李保泰續輯

甘泉縣知縣徐成敷 桂正華 朱公純 增訂

人物文苑

漢陳子迴顏方俱廣陵人與王充同時充稱之為班固揚雄傅毅之徒雖無篇章賦頌文辭斐炳賦象屈原賈生奏象唐休谷永並比以觀好其美一也當今未顯使在百世之後則子政子雲之黨也 王充論衡

徐淑字伯進廣陵人寬裕博學習孟氏春秋公羊傳禮

記周官善誦太公六韜交接英雄常有壯志官渡遼將軍有名於邊子璆仕至太常卿

後漢書

皇象字休明廣陵江都人幼工書時有張子竝陳良甫能書良甫道而子竝峻象斟酌於間甚得其妙一時善書者不能及也官至侍中青州刺史人謂象章草入神八分隸入妙篆入能建業有吳時天發讖及吳大帝碑在江甯府皆象書也

吳志

宋顧紳廣陵人永初二年二月駕幸延賢堂策試諸郡秀才揚州顧紳豫州殷朗所對稱旨並以爲著作郎

萬曆

府志

梁高爽廣陵人工屬文齊永明中贈衛軍王儉詩爲儉所賞及領丹陽尹舉爽郡孝廉梁天監初歷官中軍臨川王參軍出爲晉陽令坐事繫治作鑊魚賦以自況其文甚工後遇赦免頃之卒

梁書

唐公孫羅揚州人官沛王府參軍無錫丞曹憲以梁昭明文選授諸生羅與魏模李善相繼傳授其學羅有文選註文選音義

唐書

魏模江都人武后時爲左拾遺模師曹憲傳其文選學

同上

奚陟字殷卿少篤志羣書擢大厯進士第又舉文詞清

麗科授弘文館校書郎仕終吏部侍郎卒贈吏部尚書世謂陟善於其官智足自處嘗與柳宗元父為友姓名見宗元所為石表之陰

萬歷縣志

王紹宗字承烈江都人少勤學徧覽經史尤工草隸家貧傭寫佛經以自給每月自支錢足即止雖高價盈倍亦即拒之徐敬業起兵揚州聞其高行徵之不起事平則天召至東都擢拜太子文學累補祕書少監紹宗性雅澹以儒素見稱當時朝廷之士咸敬慕之卒於鄉里嘗與人書曰鄙夫書無功者特由水墨之積習耳常精心率意虛神靜思以取之吳中陸大夫常以余比虞君

以不臨寫故也聞虞被中畫腹與余正同虞即世南也

紹宗兄元宗隱嵩山號太和先生傳黃老術

唐書

李該字彥博廣陵人學無不通尤好地理圖志患其詞繁載繆法先聖之制黜諸子之傳考職方異同該暢簡核成一家言猶懼後生莫窮其奧又作地誌圖凡禹蹟所至漢譯所通莫不備載乾象坤勢炳焉可觀呂溫藻翰擅一時於流輩少所推尚從該遊獨久稱其為博達之士為序地圖云

康熙府志

續志考正又複見方伎內

五代馮延巳字正中廣陵人以文雅博瞻稱南唐時授

祕書郎歷官至左僕射同平章事延巳工詩雖貴且老
不廢識者謂有元和人氣格卒諡忠肅

萬曆府志

馬令南唐書云元宗樂府詞云小樓吹徹玉笙寒
延巳有風乍起吹皺一池春水之句皆為警策嘗
戲延巳曰吹皺一池春水干卿何事延巳曰未如
陛下小樓吹徹玉笙寒元宗悅

潘閔字逍遙江都人嘗居洛陽賣藥暇日負囊騎驢看
山行吟意有所適終日弗返好事者繪為圖孫僅魏野
皆有詩贈之至道初有言其能詩者因召見崇政殿賜
進士及第授四門國子博士後坐盧多遜黨變名姓緇

服入中條山嘗題詩鐘樓句奇崛僧疑而迹之逸去朝
廷捕治方急閔度不免出首謫信州移太平結廬郡治
西南瀕溪居焉吟咏不輟詩苦淡清勁劉放謂其不減
劉長卿後不知所終

姓譜

仲并字彌性江都人紹興進士歷光祿寺丞終朝請大
夫淮東安撫使參議幼好學強記每一展誦終身不忘
其母嘗屏所觀書几上惟臺歷一冊明旦默記纖悉不
誤并為文閱肆不羈而關鍵整密所著有浮山集十六
卷

萬曆縣志

明李鴻漸江都人洪武初以文學徵仕至刑部尚書明

初薦辟由人材仕者江都計二十餘人惟鴻漸以文學見徵當時榮之

萬歷縣志

張金字伯堅江都諸生博學能詩家貧有節操不俛仰世態嘗謂其門人某曰貧也奈何某曰聞天之道不絕善人先生幸自寬金笑曰所恃者此耳後竟以貧終老曾預修嘉靖維揚志

同上

李自奇字季常先世自陝西遷江都自奇八九歲能誦史記文選諸書父奇之命治舉子業自奇踈而辭曰帖括役公車兒不願也遂肆力於古文詞尤工六朝小賦及樂府其書篆籀八分行楷靡不工八分尤入妙

萬歷縣志

高懋功字世賞少卿澇子登嘉靖戊戌科武進士授錦衣衛左所鎮撫罷還江都故業解盡無以為家工為詩尤喜奕陸弼稱其五七言近體駸駸錢劉佳境下亦不失為戴叔倫溫飛卿之流卒年九十

同上

沈珠字汝淵江都人中正德丙子鄉試卒業南雍從祭酒湛若水授體認天理之學令永新頗著異政陞南京國子監丞告歸若水徒滿四方而珠為都講迨老益洞徹其旨時人宗之稱艾陵先生

萬歷縣志

何堅字叔節江都人副使城之弟嘉靖庚子舉於鄉授臨江府通判攝峽江令縣稱治遷藩府審理請老歸以

著書爲事闔戶不交當世嘗著律呂書又有漕渠七議當世多采用之始與兄城師事關中呂柟俱力持師說以破羣議世稱體道信義者必曰何叔節云

萬曆府志

葛澗字子東其先鳳陽人父欽徙江都欽嗜古書構樓五楹藏書數千卷至澗益至萬餘卷江淮間稱積書多者無如葛氏澗博學有名理坐臥一樓手一編寒暑不廢嘗撰本朝人物編始洪武迄嘉靖數十百卷人爲列傳甚悉少從湛若水遊德器深粹年七十餘卒

同上

周璠字子重江都人以郡諸生補太學性沉鬱刻意爲古文詞嘉靖間授息安縣主簿旋罷歸初璠與同里史

起蟄李應陽葛澗輩並以博學稱互相切劘璠旣歸諸人雨散獨璠偃蹇故居翛然以著述自喜其書多散逸或爲人乞去惟存邗城子二卷葛澗序之

萬曆縣志

黃一正字定父江都人博涉羣書爲文雄卓典麗屢試棘闈不遇銳意爲詩賦古文詞蠟屐負筴遍遊海內過名山川輒有記廷尉陳王叔好古多聞稱爲畏友司寇王世貞秉人倫鑒見一正曰博學宏辭吾目中僅見定父留之弇山園讀書子明昌十歲侍父客分韻賦金山詩有孤島擎飛鷺狂瀾壓伏牛之句長以例貢入太學驚才絕艷所著有五經埤傳事物紺珠等書

同上

蘇光達字觀五江都諸生性至孝五歲失母哀毀如成人鄰母憫其幼市羞脯啖之拒不食長嗜學家故貧從知交借書課讀冬無完衣環走一室跳踊以敵寒終不輟卷暑夜置足囊中披襟朗誦日出猶篝火熒熒几席間爲文疏達頗得眉山之致性諧曠獨不善佛氏說謂盡性立命聖學本明奈何寂滅詭道其持正如此七試棘闈不遇摧鬱得病死年三十八易簣時尚手持一編就暝云同上

顧大猷字所建夏國公成之裔孫以勳衛帶刀侍從旋謝病歸讀書修韋布之行折節置驛延請四方賓客聲

稱藉甚嘗遊秦中賦詩弔古留連武功鄠杜間訪問康王遺伎召置坐中青衫白髮歌殘曲道故事風流慷慨長安少年至今傳之用御史薦募兵江淮間兵甫出被讒謫戍赦還母死身病早夜呼憤邑邑不得志而卒大猷事母篤孝撰鎮遠先獻記敘述先人勲績甚備搜採掌故條列時政著書數千卷秘不以示人私謚孝譽先生列朝詩小傳

宗名世字良弼興化籍江都人萬曆己丑進士初任紹興教授行至夢筆橋夜泊夢江淹以綵筆三授之曰俾爾三世享文明秩滿陞肥鄉知縣以簡靜鎮俗邑人德

之歷陞工部營繕司主事以病乞歸曰可重理邗水魚竿矣年八十卒祀鄉賢所著有發蒙史畧一卷含香堂文集十卷子萬化中己酉北直鄉試仕潮州同知灝癸未進士孫元豫元鼎俱有文名

康熙府志

陸弼字無從江都人自髫齡至老治博士家言伊唔吟哦日夜不少廢又好博涉多所撰述廣陵為南北孔道請延賓客納結賢豪長者其聲藉甚嘗為詩曰匣有魚腸堪借客世無狗監莫論才何元朗激賞之趙貞吉當國議修正史請徵故知縣王鳴故同知魏學禮太學生王穉登生員陸弼入史館與纂修未上而罷年七十餘

卒有正始堂集二十餘卷

列朝詩小傳

白應虛字子直由選貢歷知新樂桂東正陽三縣所在著善政解組還偃仰一室左圖右書尤工五古詩直窺韋柳籓籬陸弼盛稱之

萬歷縣志

張懋勳字堯光江都諸生性嗜學鍵關兀坐者三十餘年自謂于理學有得所著有二劍齋日編及心學正統等書

康熙府志

李通字伯經江都諸生天啟癸亥禮部徵輯萬歷泰昌兩朝實錄以特恩授廣安州佐

康熙府志

陳以忠字恕先江都諸生性孝友析箸時盡以父產與

弟曰吾有硯田可耕也精於易義常曰六爻之義統於大象更爲六十四卦大象說黃汝亨見之曰今之虞翻也爲文宏深典博年六十四卒 同上

蔣善字元長江都人崇徵丙子魁於鄉閉戶安貧研求邵子河洛數所著有史記彙十卷 康熙府志

孫鼎字大宣江都人崇徵丁丑進士授大理評事典試四川所拔皆名雋丁內艱歸不復仕閉門著述吟觴自終子繼登繼邈皆有文名 同上

魯東錡江都人拔貢生工詩文書畫著有偶然集 同上

王玉藻字質夫江都人銓部觀濤子也登崇徵癸未進

士筮仕得浙江慈谿令未久歸里閉門謝客怡情詩酒自附東陸栗里之遺後作絕命詞飄然而逝子方岐博學能文克紹家學云 康熙府志

國朝宗觀字鶴問江都人主事名世之孫以江甯籍中壬午江南副榜康熙間授貴池學官數年復遷常熟皆有師法爲四方所稱道觀性敏好古勤學尤長於詩而襟懷曠朗不問家人生業故其詩蕭疎幽雋近於韋柳新城王士徵甚愛賞之生平篤於朋友皆以學問相取吟詠之外卽無所與年七十餘卒有詩文集數十卷藏于家從弟元鼎亦以詩名 舊府縣志

徐石麟江都人閉戶著述有趨庭述訓枕函待問北醒語天人升降圖說等書同上

按石麟貢於康熙年間前志編在明末誤

吳綺字蘭次五歲能詩長益通詞賦尤工駢儷體以順治中拔貢爲內閣中書舍人奉

詔譜楊

繼盛事傳奇禁林傳演歷工部郎中知浙之湖州府濬

城南碧浪湖構峴山諸亭與賓客爲觴詠之地明末凌公義渠殉難死久而未葬綺爲購地葬之未幾罷歸貧無宅借廢圃以居有求詩文者訂酬以花木因名種字林而與文人爲春江花月社以老焉所著有林蕙堂集

記紅集輯宋金元詩永堦江闈字辰六康熙癸卯舉貴

州鄉試第一亦工詩古文

與吳士對中書林中

汪耀麟字叔定邑諸生有文筆幼與弟懋麟齊名而友愛之誼亦最篤康熙二十六年弟官比部報罷傳聞禍且不測急走都下偕之歸連墻以居倡和共晨夕以老有抱耒堂集二十六卷子荃亦有文名

汪懋麟字季角蛟門其別號也康熙丁未進士祕書院中書舍人每入直必攜書展讀夜分不釋卷楚中有妖人朱二眉以左道傾動朝右懋麟著辨道論闢之薦博學宏詞以憂歸未赴服闋以主事與修明史越二年補

刑部主事能辨疑獄中蜚語罷歸杜門謝客日治經夜治史以夾深通志太繁手刪減細書之其為文法歐曾詩合杜韓蘇陸為一家所著百尺梧桐閣集二十三卷

縣志

吳蓮字余嘉江都人幼孤奉孀母苦志力學補諸生食餼以文章知名四方負笈從遊者甚眾垂老膺歲薦惟以著書教子孫為事有愛日堂文集玉井詩詞若干卷子高佐志祖俱歲貢生孫顥孫康熙庚子舉于鄉高以位字素其孝健長子康熙庚戌進士授中書科中書舍人平居著述後學奉為楷模家教尤嚴肅弟以佑

聖脈

字天申天性醇謹生平無疾言厲色佑子克謩康熙丁

卯舉人漢陽知府

桑豸字楚執江都人早歲能文兼工書畫篆籀既餼於庠力學篤行推重鄉里丙寅膺歲貢著有編年詩存四十卷文集二十卷廣陵紀事四卷

續志考正又複見方技內

許承家字師六承宣弟幼與兄刻苦力學同負盛名康熙乙丑成進士改庶吉士授編修年已六十餘掌院知其宿學遇有大著作多屬之辛未充會試同考官將循資遷坊局念兄方里居亦請假相追隨如少壯時兄歿

思念流涕不置振乏周急於友誼尤篤與人交推心置腹藹然可親所著獵微閣集 雍正府縣志

程文正字笏山之謨子少工詩文善書法尤精制藝康熙辛未進士筮仕工部都水司主事巡視街道洗手供職不名一錢以疾歸卒年四十有四有水部遺詩一卷子夢星康熙壬辰進士翰林編修

顧圖河字書宣江都人父九錫有文名多著述圖河淹治經史工古文辭書法得虞褚風格方為諸生名已著康熙甲戌登一甲第二名進士時

聖祖覽對策至治河一條曰熟悉形勢必生長江淮留心時務

者自是深被知遇授翰林院編修充日講官直南書房與修一統志皇輿表考核精詳同館推為鉅手出視湖廣學政抵任三月卒于官所著雄雉齋集 雍正縣志

楊文郁字天式號松齋家世宋元來甘泉土著文郁以歲貢官廣東連州知州有宦績壽九十八桐城相張公題德壽先生四字贈之子維漢字倬雲號星樓工詩文庚子舉人授中翰孫政極膺薦官于汴開鼎已未庶吉士

吳蔚起字豹文本歙人隨父從殷居江都早年好學屏跡郊外僧舍刻苦文藝康熙丙子舉於鄉上公車不第

自悔曰吾學未充也聞宜興儲欣大名負笈往從之欣令盡棄其向所學專攻左史及唐宋古文三年業大進癸未成進士授戶部主事歷員外郎郎中皆以恪勤供職擢御史巡視南城有油賈與民構訟持數千金求直蔚起嚴拒不受卒置之法歷掌京畿道事以終養乞歸閉門却掃有造謁者咸辭不見子安國康熙辛卯舉人

雍正縣志

楊潛字滙南江都人幼嗜學善詩古文備四體書法以獻賦取入纂修館康熙辛卯舉順天鄉試壬辰

賜進士改庶吉士授翰林院檢討潛博聞彊記一寓目終身

不忘家貧母老每得俸先封寄以養之以疾卒于官雍正縣志

江都縣志

續志考正省志載江都應行在召試者五人

方覲吳從龍郭元鈺李同聲及潛

魏嘉琬字篁中都之子也內行克修資稟尤不世出書一手觸卽富於胸於文章諸體無不兼擅其長制藝善抉摘幽微直造精奧宗伯許汝霖視學江南拔冠儀邑見其方落落年少驚歎曰其才其年均不可及也康熙丙子舉于鄉名輩皆以大魁期待之兩試禮部不售卒年僅三十有三宜興儲欣德州孫勳爲序其文稿行世

義門何焯讀之謂必傳于後無疑也有咀蔗菴詩八卷
何焯爲之序比之唐李賀云

雍正府縣志

郭嗣齡字引年光子繼光兄奎爲後奉母以孝聞家貧
授徒以修脯爲其兄嫂營喪葬生平講程朱正學所著
神化性命通二無二論士林傳之其傳記序說皆具古
法康熙乙未成進士授松江府教授勤於課士雍正癸
卯浙江同考官以病歸學者稱爲述堂先生

雍正府志

吳志祖字立先世由歙遷揚弱冠爲名諸生以序貢
司訓宿松以表節義正文體杜奔競三事請詳上官多
舉行暮年懶于磬折遽引疾歸所著有愛日堂後場表
式尙書纂要詩古文辭若干卷仲子顓孫庚子舉人叔
季清浩俱聲聞庠序

陳新楷字依宣揚州人父著歲貢生以文行稱楷髫年
應試屢冠其曹試藝傳誦人口制行無緣飾孝友純篤
其天性也構屋授徒從遊者甚盛同時有陳霆發字鳴
夏與楷齊名善爲古文辭未遇而歿楷年逾七十膺歲
貢子夢文雍正癸卯舉于鄉

雍正縣志

聖祖南巡元鈺于宮士璟子生數歲卽善屬對及長工詩文
修佩文韻府又奏選刻全金詩輯元好問中州集并上

之授內府中書科舍人徙直禁苑編金元樂府壬寅夏
橐筆熱河初冬病還逾月卒有一鶴菴集牛鳴雙村集
唐顯祖字右文名諸生也內行純謹循循然具矩度諸
弟並仕中外顯祖以家督束其家褐衣徒步不失其舊
人以此多之子倚衡乾隆元年舉人

蔣繼軾字蜀瞻號西圃性真誠篤於孝友沉酣六籍善
屬文兼工書法康熙戊子舉於鄉癸巳成進士改庶吉
士館試輒高等授翰林院編修丁酉分校京闈所得盡
知名士纂修明史及萬姓統譜能勤其事而以前後兩
喪皆不得親視含殮傷迫於中請假歸里蕭然一室圖

書外一無所營也卒年七十一子五人登甲乙科遊太
學俱知名者

陳倓字定先別字愛川自幼喜研經尤邃於易康熙庚
子舉於鄉署睢甯教諭益讀書精楷法癸丑會試第一
人廷對

世宗又擢爲第一授修撰乙卯分校順天鄉闈充文穎館提調
與修 國史 實錄及文獻通考乾隆二年

命充安南冊封使使旋卽

命典順天武鄉試駸駸大用而念切祖墓在甘泉一子始孩欲
假歸省視積勞病作卒于官

黃湄字伊人江都諸生博通經史工制舉業教授生徒間入文幕得資斧養母給昆弟喜聞揚忠孝大節撰志傳以傳哭母致瘁而卒 雍正府志

余元甲字葭白一字茁村早歲工帖括補博士弟子後工為古文刻厲排募得曾王之遺尤工于詩不同流俗與四方名人倡酬最夥而又敦篤交誼嘗脫一友于囹圄中所費不資他飲人嫁娶喪葬缺乏者不可枚舉雖室中告匱不顧也著籍內閣中書雍正十二年通政趙公之垣以博學鴻詞薦不就所著濡雪堂集所選有韓白蘇陸四家詩新城王阮亭先生序

葛崙字星濤歲貢生事母極孝性直無依回喜談忠孝節烈事有遺佚必表出之外若不羈而中則介然也所著有四書杓指

尤璋字仲玉幼孝友以祖產讓之昆弟及昆弟貧困仍贍給之雍正間歲貢舉孝廉方正卒

錢志遷字□□有文筆康熙四十六年

聖祖駐蹕揚州志遷進所著衢歌集荷詩字俱好之褒蒙旨取入纂修館 以上原志

唐紹祖字次衣詩第二子康熙己丑進士選庶吉士座主為安溪李文貞公闈中已定元矣後不果屢有樊川

第五之歎既而與參性理文章之旨沛然大肆力於韓歐古作者爲館閣鉅望由編修久次出守湖州講求民瘼作養多士郡中能文知名者咸出門下承指授復入爲禮刑二部郎中著有改堂文集子思雲南呈貢知縣嘗攝騰越州值緬甸用兵爲邊境衝要撫巡守禦皆有方畧力能敵數十人歸里後與兄桂白首友于徜徉詩酒以卒

金門詔字軼東才學淵富久因公車鄂西林相國延入幕總督滇黔時所裨贊爲多丙辰舉博學宏詞卽於是年成進士選庶吉士格於例不得應宏博試以才名充

三禮明史館纂修散館改山西壽陽知縣未幾投効歸馬榮祖字力本雍正壬子舉人十三世祖予堅佐明太祖有功賜第揚州曾祖啟象以貢官閩縣知縣少負異才左國班馬之書如宿讀制舉文師法韓歐有法度於詞賦非所長也應宏博試報罷選閩鄉令邑僻處山陬士子鮮師承爲築荆山書院躬與講授人文蔚起調鹿邑治如在閩鄉引年歸著力本文集內文頌二卷與司空圖二十四詩品異曲同工海內名流皆歎服焉唐允恭字樊謙嗜經史兼治方經勾股之術終日閉舍讀書中年尤肆力於考釋嘗入北河傅副使幕多藏書

披覽殆遍然性峭厲不能容人過卒爲幕中人所中而歸著宮室考百二十卷手錄三過自謂精神盡注於此嘗一日與友泛舟北郭雷聲殷然因持酒曰子知舟與雷之義乎周禮春官載六尊六彝彝有舟尊有壘舟濟物者而溢其量則沈靈動物者不以其時則淫受酒之器古人有取義焉會野有祭於冢者坐人舉古不祭墓之義允恭曰非也宗伯冢人凡祭墓爲尸古之舉是禮也久矣亡者之靈求於墓胡忍不索於冢其疏通淵雅如此晚歲坐臥一小樓非契厚者憑欄一語而已書惜無傳本

陳儼字敬輿歲貢生少習負販爲一諸生所侮遂發憤讀書嘗手寫七經爲文一主理法教範端嚴後生遊其門者示以正嘉先輩宗傳以逮選家汪何相傳格律於四子書溯原程朱一不龐雜也時未行試帖鄉曲子弟從事於帖括之學不務博覽才者遂以空疎目之然一時循謹鮮僣越者刻有折字新編爲初學津梁甘令劉履乾重其人而序之年九十卒孫德瑛諸生馬曰琯字秋玉曰璐字珮兮本籍祁門以業齋家揚兄弟並博學工詩好客築室街南爲讌集之地酷嗜古書海內奇文秘簡不惜重價購求所藏書畫碑板甲於江

南北延館四方名流日爲文酒之會凡搢紳往來之有文望者咸納交恐後寒士挾一藝至亦必不失其意去昆仲旣皆傾心風雅同里諸才彥又相應和敦槃遞主觴咏無虛數十年邗江勝槩不減顧阿瑛玉山草堂也身後叢書樓遺書進呈備採者多至七百餘種特賜古今圖書集成榮之曰璐舉丙辰宏博未赴試閔華字玉井少不習舉子業刻意爲詩時讓圃及小玲瓏山館詩社方盛杭太史董浦主安定書院詩酒高會華每與吟唱酬答奉母孝諸名士以時稱觴上壽陶然至樂多識鄉邦故事每見詩篇不屑屑塗澤爲工也

陸鍾輝字南圻以貲官員外郎出爲南陽府同知告養歸復起爲刑部郎性雅素有詩文山水之好當官能勤職業嘗築室栖霞居之在里與馬氏昆仲輩相酬和詩詞宗法姜白石手校刊其集又嘗得南宋江湖小集六十餘家選葺十二卷行世蓄圖書甚富多秦漢章落落不屑事生產晚遂有生事之嗟

張四科字喆士臨潼籍以鹽筴家於揚屢試不遇工詩少年嘗賦臙脂爲時傳誦有張臙脂之目以友朋爲性命延致文學士禮遇於家終始耐久不問家人生產聚書嘯咏與玲瓏山館相應和詩晚境盡洗穠纖直入高

章之室生事日減弗顧也

江立字玉屏由杭徙揚好古工詩填詞直入姜白石張玉田之室與宗人江昱並稱王蘭泉司寇采入琴畫樓詞嘗得宋刻趙明誠金石錄不全本因題其齋曰金石錄十卷人家子安儀徵籍諸生

王世球字熙聞世錦字濯江爲諸生皆有名王已山太史主安定書院論文甚矜嚴極推許引重制藝外並善古文詞自相砥礪時稱爲二王屢困場屋世球舉優貢先卒世錦以次歲貢爲邗江課士堂院長後學翕然宗之

姚剛字直夫丙子舉人工制義赴春官不第歸課後生爲舉子業循循善誘不務詭異門徒常數十人歷先後數十年與同里劉沂並稱盛沂字艾山歲貢生邵伯後進之向學者咸受裁成於兩家焉

劉瀚字鯤池爲文師西江派而尤近文止性狷靜寡諧陳見復查星南諸先輩皆重其文品而惜其不宜進取然終不屑追逐也以貢司教含山有富者規取學中地瀚力不能止遂歸課數童子自給嘗曰吾但從蒙稚訓句讀意便豁然不復能爲後生舉業揚其流波也門人趙洵刻其文稿行世

吳均字梅查刻意爲詩及與厲太鴻杭堇浦相唱和遇鄉邦節烈忠孝故事尤喜表彰年齒高晚歲詩社漸散後起少應和者泊然自守

朱篔字二亭工詩廉介自守嘗有宗人爲熟官不私干謁混跡闖闖中詩刻意學三唐桐城姚鼐最相契爲序其二亭詩鈔子慎履恩貢生

汪中字容甫江都籍少孤貧母鄒氏通書史口授小學諸書稍長與書賈交借讀經史百家過日成誦遂成通人焉少喜作詩兼工駢體文晚年顓治經術沈博閱覽通知古今才學識俱有以勝人古文詞醅茂淵懿義例

謹嚴鎔鑄漢唐於歐會王蘇之派無所攔入亦無刻意摹倣排比奇字之習生平著書之指在精不在多嘗自訂述學四卷行世他所著述數十卷藏于家

汪棣字韡懷戶部郎天與孫籍儀徵棣隸庠序有名屢困秋闈由國子博士歷刑部員外郎少喜爲詩時揚多通人名士之流寓者日與相切磨縞紵遍大江南北傾懷納契居上海凌司馬甥館交日益廣同游如王西莊光祿蘭泉司寇惠定字徵君皆締文字之好告歸以詩自娛年逾八十雖貧怡然也詩以山谷爲宗生硬不趨甜美子光熾廩生有文學光烜部司務

殷盤字銘載謹厚好學在府庠有聲嘗以俗學承襲偏
旁點畫多失六書之意與同志張宗泰謝為珠等相講
究劇切啟牖後生校刊周官鄭注勘核不苟未及貢卒
子長福壬戌進士

郭均字職民先世自關中來入揚州商籍後改歸甘泉
郭氏代有文譽均少雋異咸目為神童丁酉受知嘉善
謝金圃學使充選貢生丙午丁未聯捷成進士授戶部
主事到官七日念本生母年老在籍即請告歸家甚貧
主廣陵書院日洩洩膝下如孺子母享大年以終服闋
後尋卒無子時共惜之

潘純鉦字雅堂詔安知縣正鵬子自幼穎異隨父任婦
翁張鳳儀時宦閩故舉鴻博有文名純鉦得內外之訓
涵濡漸染於詩古文皆有家法弱冠舉鄉試間十年成
辛丑進士授刑部主事時望蔚然旋假歸病卒年甫三
十七子修福郡廩生

以上續志

管粵秀字南英號甌山祖一清乾隆四年進士由庶常
改知縣補廣東增城縣以摘發鄰境伏莽計功赴部卒
於旅舍粵秀生於廣東故名早孤幼穎異擅文名乾隆
五十七年舉人屢赴春闈不售客京師最久後橐筆遊
楚越間譽望日起晚年選奉賢縣訓導因病不能赴任

尋卒著有易義舉要春秋釋例辨甌山詩集八卷

府志並思

編古

黃文暘字秋平貢生素通聲律之學乾隆年間兩淮鹽政設詞曲局延為總裁成書進呈為詩清越高潔稱其為人壯年奔走齊魯吳越間泊返里後運司會燠招入題襟館中與時流相倡和所作益多著有掃垢山房詩鈔十二卷妻張氏名因自號淨因道人亦工詩著有綠秋書屋詩一卷遺集一卷子金字小秋諸生夙承家學並以詩名

學經室集思古編

江藩字鄭堂監生少受學於元和惠棟吳縣余蕭客江

聲博綜羣經尤熟於史事性不喜唐宋文每被酒輒自言文無入家氣人目為狂不屑也幼蓄書萬餘卷歲饑盡以易米作書窠圖志感一時耆宿題詠殆徧阮文達公元雅重其學督漕淮安時禮為麗正書院山長藩會恭撰

純廟詩集注由大學士王文端公杰進呈

恩賞

御製詩五集後

諭召對圓明園值林爽文陷臺灣報至遂輟人惜其遇藩性仁

厚輕財仗義急友朋之難窮困以終著有周易述補一

卷

國朝漢學師承記八卷宋學淵源記二卷隸經文四卷炳

燭室雜文一卷

思古編

程壽齡字漱泉自幼天姿超卓善屬文工詩詞繪事於白描人物尤精嘉慶三年舉人七年進士改庶常散館授編修存升贊善任雲南學政回京適大考有權貴愛其畫索以素箒固不與左遷主事以疾終著有詩文集若干卷

行狀

羅士琳字茗香早歲精天算之學以天文生入欽天監推算道光初元日月合璧五星聯珠受知於肅邸為同

輩所嫉不得官去之嘗東出山海關客汴梁楚中所至為通人名德所賓接而阮文達公元尤推重之事母孝性耿介咸豐元年舉孝廉方正未赴試三年粵匪陷城被害士琳以天算之書得周髀之精意者莫過秦道古之正負開方法與李銳之天元一術而朱松庭集其成皆通貫其術殫精竭思窮極窈渺著書至富其言秦氏之學有勾股截積和較算例其言李氏之學有勾股容三事拾遺三角和較算例弧矢算術補其言朱氏之學有四元玉鑑細草四元釋例演元九式臺錐積演算學啟蒙疏釋又以在欽天監時推十年交食用現行橢圓

法著交食圖說舉隅用監中推算日食坤輿圖法益以
 新術著增廣新術又補宋仲子之七厯著春秋朔閏異
 同補祖冲之之綴術著綴術輯補又因讀書而旁及算
 術著淮南天文訓存疑周無專鼎考錄講貫天算之人
 以續阮文達公之書著續疇人傳博能叢話總為觀我
 生室彙稿所作駢儷之文以唐人為法尤工集句以為
 談藝之餘名其集曰觀我生室賸稿得且住菴文集
青溪舊屋文集
 江懋鈞字季調年十六父歿母哀痛失明懋鈞涕泣之
 餘強為懽笑以解母憂早補諸生試輒高等叔父藩以
 樸學名東南所交多海內通儒每宴集懋鈞皆侍由是

學問日進性狷介不喜與貴遊通書而里居則恂恂退
 讓教授生徒成就者眾著有詩經釋義二十卷爾雅旁
 證八卷鷗寄齋古今體詩八卷子璧同治二年解元聯
 捷進士官江西進賢知縣行略

葉觀庭號竟亭貢生早負俊譽為文儁穎無與抗者屢
 困場屋家益貧蕭然敗堵惟飲酒賦詩而已子貴曾字
 酒生諸生天性純厚亦善詞賦父子著述兵燹後多散

佚傳

李周南字冠三號靜齋嘉慶六年拔貢十二年舉人十
 九年進士以主事籤分刑部到部方浹旬以母老乞養

歸侍閱五載丁母憂哀毀盡禮服闋以子幼展墓無人
決計不出居家教授生徒一時推為文章宗匠後寓居
袁浦以微疾卒年七十一著有洗桐軒文集詩集

王峻字春江嘉慶十八年副貢才思英偉博涉經史兼
貫天文壬禽句股奇門之學鄉里義舉尤樂贊成子恂
字伯醕貢生天性孝友工為文著有桐月山房文二卷

蓮溪詩賦鈔二卷
黃兆萱字瑞堂號蔗塘貢生天性誠篤讀書必究根柢
誘掖後進四方從學者多所成就著有橋西一草堂前
後詩集十二卷尚友錄二卷讀史評一卷蔗塘隨筆二

卷子庭範另有傳
鄧立誠字溥泉嘉慶三十四年舉人倜儻有才思善屬
文精文選理博覽經史於兩漢地志尤詳性高曠不喜
偶俗五十餘以貧病終所著書及詩文皆散失思古編

李澄字練江號夢花貢生書法魏晉文精唐宋人格律
著有春秋左氏全書人鑑淮巖備要夢花雜誌詩集文
集若干卷同上

張春雷字安甫諸生屢試不第遂肆力於古文辭精書
畫耽吟詠輯有古文分體簡鈔古文體製撫言著有香
月山房詩存畫解隨筆畫論題畫草雜著諸書同上

增修甘泉縣志 卷十四 人物文苑

王詔字殿揚諸生居赤岸湖家有望湖草堂與阮文達公歸田後所築萬柳堂相距不遠往來過從倡酬頗多子開業字子駿廩生工文詞有時譽藏稿百餘篇待梓開益字望三亦諸生著作甚富嘗往來淶洋湖作淶洋小記凡有關於時勢風土者悉著於篇開業另有傳薛傳均字子韻諸生少工駢文禡麗冠儕輩博覽羣籍強記精識沈潛謙退不以所能自高十赴鄉試輒報罷以家貧就福建督學陳用光聘用光見所著書恨相見晚旋以疾卒於汀州試院年四十一傳均於十三經注疏及資治通鑑功力最深於說文鈎稽貫串洞其義而

熟其辭嘉定錢大昕文集內有說文答問一卷深明通轉假借之義傳均博引經史以證之成說文答問疏證六卷又以文選中多古字條舉件繫疏通證明為文選古字通十二卷其客閩也編所賦詩為閩遊草一卷

舊屋文集
安吳四種

楊亮字季子監生少保敏壯公捷五世孫亮早工詩古文詞取法漢魏游京師從大興徐松受西域輿地之學孳究精審松謂其學有替人曾千里歸故友之喪人尤高其行誼咸豐三年粵匪陷城絕粒死著有蒙古道里考圍城日記世澤堂詩文集

安吳四種得
且住菴文集

潘輔之字敬敷嘉慶十二年副貢咸豐三年賊竄郡城倡義防禦積勞成疾卒年七十六著有庸行錄及菜根香詩集沈慶字心盦素有棋癖詩筆清雋粵匪陷城絕

粒死正雅集

吳慶恩字蓋山諸生幼隨祖官河南未弱冠作洛陽懷古詩驚其長老工為樂府詩每酒酣耳熱鬚眉欲動談先朝掌故不輟後進恆樂與之遊咸豐三年城陷被害死著有毛詩辨證麗則堂詩四卷傳略

汪承元字慕杜道光十五年順天舉人咸豐三年進士改庶常授職編修九年典試浙江以會辦五城圍防保

升五品京堂生平篤信宋五子書伉直有氣節尤喜引掖後進書宗平原為詩專慕少陵因以自號卒年甫五十

趙煜字松埏道光十九年舉人五試禮部未售主試者知其能文欲招之見婉謝之素從事經學小學無意進取嗣入淮南書局校刊經史分纂韻詁多山其手卒年六十二著有說文今韻啟蒙及紅薇館詩鈔行略

張舒字丙生廩生師事焦循博稽經史為文恥務時趨屢躡場屋遂絕意進取益肆力於古著拙齋古文一卷又喜論史事有論唐史詩一冊以雜體附於後皆兵燹

後門人掇拾於灰燼者也

范章桐字雨秋諸生工書法善畫蘆雁自成一家貧甚

以字畫作生活一時珍之卒年七十九歲

事略

倪燦字曉春善丹青工山水得趙大年筆意又李慶字

得餘亦師趙大年兼仿袁文濤王竹里畫法寫樓臺金

碧撫漢宮春色廣寒宮圖絕精

陳瑗字筠溪工山水深得王司農法同時有孟毓森字

玉笙喬熙字瑞卿亦工山水

朱連字石齋工花鳥人物學宋人而媚麗過之又程鷺

字梧岡畫得新羅山人筆法王兆祥自稱覺非子弟應

祥字古靈汪圻字惕齋均以善畫名

以上均見府續志

蔣繼軾字西圃康熙癸巳科進士官翰林院編修性情

高澹深於經史阮文達公稱其校士授徒得人最盛方

正重於鄉里著有庭暇庸言韻綠山房遺稿嘗集少陵

秋興詩字爲秋懷詩前後八首一時稱誦

甘棠小志

常沐霖字載蘅少與兄蘭芝有聲庠序道光丙午科舉

人考取臚錄以知縣用不樂仕宦閉門教授遭揚城癸

丑之難避地北湖家室蕭然尋病終

張宗泰字登封道光二十九年拔貢生先後官天長合

肥教諭品望端方深於經史尤精天官家言著有周官

禮經正誤爾雅注疏本正誤孟子七篇諸國年表竹書
紀年輯注春秋左氏傳讀本正誤新舊唐書天文志疏
證詩文集若干卷

文汝梅字用和庠生生而穎異讀書一過成誦屢擢優
等詩才清逸鹽政會煥祭酒吳錫麒主東南吟壇提倡
後學汝梅試輒冠軍同學魁傑之士咸愛敬之晚號香
月老人著有香月廊詩卷行於世

林閔字苑西廩貢生福建大田令梅谿第五子也幼秉
祖父詩禮之教敦孝弟之行善屬文尤長駢體與兄開
並以詩名載在淮海英靈集江蘇詩徵子怡會附貢生

學經
室集

吳康字少文監生未弱冠能詩歌講貫唐宋諸名家著
有白茆草堂詩鈔大抵多苦吟而疎樸出之樂府五律
七絕近楊鐵崖性情靜逸處境閒曠直似淵明幼多疾
不能應舉子試以詩自娛居北湖黃珏橋數十年不入
郡城有一詩集出必購得之聞一能詩者百計求睹其
詩而後快晚年詩多率性而出以清新體似劔南得里
中徐坦菴范荃羅然倩詞因而學詞又有白茆草堂詞
鈔一卷事父事兄孝友兼盡家本素豐不博好施之譽
親族有不足者訪察周卹惟恐不到歿之日親族悉悲

感焉康之兄名宗贊號與參太學生善書法家有湖田
不屑屑爲積累計亦不習於奢華衣食所餘悉以濟貧
乏者

桂斫字子香邑諸生少穎異好讀史記酒酣輒諷誦不
輟著有昂青閣詩文集三卷史記論事一卷性疏傲不
諧於俗人目爲狂生與同縣諸生張采友善采字克之
好漢書

歐陽錦字製美諸生幼貧攻苦邃於經史教授鄉里時
彥多折服爲焦里堂孝廉校錄北湖小志凡志前圖說
方位多錦參酌焉著西江吟草一卷倚槐亭詩集四卷

卒年八十有六

裔榮字向之縣學生幼邃於學與黃承吉焦循友善以
文藝相切磋稱爲畏友而榮獨不遇以授徒自給著有
向之詩集

詹淇字叔梁號讓翁歲貢生敦品行著書爲善鄉里間
有長者風與王止堂林得齋爲契友往來辨難廢和無
虛日著有藝林文集□□詩鈔

林道源號庾泉廩貢生善書工詩著有一無所知齋詩
稿重友誼有至性幕游京師劉文清公極賞其書法嘉
慶間阮文達公撫浙時開西園接賓客暇嘗射鵠聯句

林得句極佳同輩爲之擱筆載定香亭筆談
張雪堂諸生居西山工詩善書法子信孚孫星珠皆邑
庠生

許瓚字玉槃工小篆善鐵筆著有鹵亭印譜卒年八十
有六子之翰歲貢生工詩著有說文堂詩集八卷

呂玉璜字萼舟廩生詩效陸放翁一家與湖西陳浩海
友善著有詩集孫繼賢諸生爲人灑落不屑進取

桂馨字友蘭監生工詩與朱二亭文衡夫結吟社著有
繭餘軒詩存

桂達生字康衢監生好學早世著有楚詞王注疏十七

卷楚詞異解輯案八卷希墨仙館詩文三卷擬倉谷詩
一卷

姚澍字雨田學優品粹科歲屢試冠軍文名最著教授
生徒弟子掇巍科者甚眾澍獨以明經老晚以歲貢生
選如臯縣學訓導卒於官

羅聘字遯夫號雨峯晚號花之寺僧工詩善畫著有香葉
草堂詩集

江瀛字在洲襟度端雅工詩畫尤嫻音律著有詩集詞
集生平伉爽有氣節嘗從事戎幕屢著勞勩雖膺卓薦
視功名如敝屣有不爲五斗折腰之風族弟慶瀾占籍

儀徵爲茂才以書法名世其雅度與瀛相伯仲時論美爲一難云

王玉榮字戟門號藻仙廩監生由庶常改戶部名翊號瓊園孫也夙攻舉業屢薦不售遂究心根柢之學教授生徒多所成就家素寒敦品勵節後學奉爲典型著有澣香吟館存稿並自序存於家塾待刊卒年六十餘歲子光業恩貢生年五十餘卒

徐賓基字瀛卿號芙江邑增生素敦孝友篤志績學爲文清超拔俗不染塵氛肄業安定書院俞陶泉都轉謝椒石山長每亟稱之著有遺稿待刊汪尊卿太史思古

外編會刊其文並附以小傳卒年三十一士林惜之

蔣道誠字石鳧亦字實孚早年名噪文場食餼後貢入成均年甫三十餘博通經史一生伉爽遇事直言顏其室曰古愚書屋生平著作甚富稿多散佚晚年始選授徽州府儒學訓導卒於官

周祖金字卓顏與弟祖同先後補弟子員天性孝友樂善好施戚族中有貧乏者周之不遺餘力卒年三十七著有光霽書屋詩鈔四卷

徐根字初雲玉舉子中道光二十年舉人循例爲內閣中書幼承家學工制藝尤精詩餘晚年隱居艾陵湖東

增修甘泉縣志 卷十四
以著述自怡著有擷春詞抄擷春園詞學辨證雲川閣
傳薪要旨自娛悅集詞稿待刊

葉秉純字心曙邑庠生家素貧奮志攻苦居家孝友著
有四書徵引錄卒年三十一士林惜之

丁文楠字木千監生敦行立品工詩與里人王楠許楫
唱和有盍簪集行世

以上新增

武勳

宋陳憲廣陵人元嘉二十七年魏侵宋圍懸瓠憲以參
軍行汝南郡事城中戰士不滿千人魏人晝夜急攻作
高樓臨城以射矢下如雨又施大鉤于衝車之端以牽
樓堞壞其南城憲內設女牆外立木柵以拒之魏人填
塹登城憲督將士苦戰短兵相接銳氣愈奮魏人引兵
還文帝以憲爲龍驤將軍

宋書

南齊呂安國廣陵人有幹局爲劉劭所稱泰始二年爲
勳軍副征殷琰以功封鍾武縣男累遷兗州刺史及沈
攸之事起齊高帝以安國爲湘州刺史建元元年進爵

爲侯轉右衛將軍加給事中後改封湘鄉侯武帝卽位累遷光祿大夫加散騎常侍安國累居將率在朝以宿舊見遇永明八年卒諡肅侯

南史本傳

梁呂僧珍字元瑜東海范陽人也世居廣陵人甚寒微兒童時從師學有相工歷觀諸生指僧珍曰此兒有奇聲封侯相也事梁文帝爲門下書佐文帝爲豫州刺史以爲典籤帶蒙令妖賊唐寓之寇東陽文帝率眾東討使僧珍知行軍眾局事僧珍宅在建陽門東自受命當行每日由建陽門道不過私室文帝益以此知之武帝臨雍州僧珍固求西歸得補叩令及至武帝命爲中兵

參軍委以心膂僧珍陰養死士歸之者甚眾因命按行城西空地將起數千間屋爲止舍多伐材竹沈於檀溪積茅蓋若山阜皆未之用僧珍獨悟其指因私具櫓數百張及兵起悉取檀溪材竹裝爲船艦葺之以茅並立辦眾軍將發諸將須櫓甚多僧珍乃出先所具每船付二張爭者乃息武帝以僧珍爲輔國將軍步兵校尉出入臥內宣通意旨大軍次江甯武帝使僧珍與王茂率精兵先登赤鼻邏其日東昏將李居士來戰僧珍等大破之及武帝受禪爲冠軍將軍前軍司馬封平固縣侯再遷左衛將軍加散騎常侍入直秘書省總知宿衛天

監四年大舉北侵自是僧珍晝直中省夜還秘書五年
旋軍以本官領太子中庶子僧珍去家久表求拜墓武
帝欲榮以本州乃拜南兗州刺史僧珍在任見士大夫
迎送過禮平心率下不私親戚兄弟皆在外堂並不得
坐指客位謂曰此兗州刺史坐非呂僧珍牀及到室促
膝如故從父兄子先以販蔥爲業僧珍至乃棄業求州
官僧珍曰吾荷國重恩無以報効汝等自有常分豈可
妄求叨越當速反蔥肆耳僧珍舊宅在市北前有督郵
解鄉人咸勸徙解以益其宅僧珍怒曰豈可徙官解以
益吾私宅乎姊適于氏住市西小屋臨路與列肆雜儻

珍常導從鹵簿到其宅不以爲耻在州百日徵爲領軍
將軍直秘書省如先僧珍既有大勲任總心膂性甚恭
慎當直禁中盛暑不敢解衣每侍御坐屏氣鞠躬十年
疾病車駕臨幸中使醫藥日有數四卒於領軍官舍武
帝卽日臨殯贈驃騎將軍開府儀同三司諡曰忠敬子
淡嗣同上

唐辛讜太原尹雲京孫居廣陵性慷慨重然諾專務賑
人之急咸通十年龐興亂徐泗時杜愔守泗州賊極力
攻城讜夜以小舟穿賊壘至洪源驛請監軍郭厚本救
泗厚本然之淮南都將王公弁勸沮讜坐中拔劍瞋目

謂公弁曰賊百道攻城陷在旦夕公等奉詔赴援而逗
留不進更欲何爲卽欲揮刃向公弁厚本持之謹望泗
州大哭經日帳下爲之流涕厚本義其心選士卒隨謹
入泗夜半斬賊柵大呼由水門而入賊軍大駭退舍人
心遂固旣而賊益兵攻城以鐵鑊斷淮流梯衝雲合凡
周七月晝夜不息賴謹犯難仗義求救於淮北諸軍會
馬舉以大軍至賊解圍而去卒全一州皆謹力也謹無
子猶子山僧元老等寄在廣陵每出城則書二姓名謂
愾曰志之得嗣爲幸愾益感之賊平授謹泗州團練判
官侍御史歷嶺南西道節度使

唐書

五代呂師造揚州人爲淮南都將天復元年李神福攻
杭州浙將顧全武列八寨以待之神福使師造伏兵青
山下陽退兵以誘全武伏發全武被執天祐初復從周
本援衢州謂本曰敵去我咫尺而陳不動是輕我也必
擊之是日中道破浙軍師造實與有力焉已又從周本
南伐敗苑玫於上高遷池州團練使師造歷事吳主南
北征伐多在行間所嚮輒摧鋒排陳累官光祿大卿檢
校太保兼御史大卿

十國春秋

呂珂揚州人事吳太祖以勇敢聞累有戰功擢黑雲都
指揮使其卒也子師周代其職奔于湖南別有傳

同上

張訓廣陵人勇悍多膽畧時人謂之大口張吳王行密據合肥訓往見甚歡授親兵擊舒州盜吳迥等揚州之役訓潛入城滅餘火得穀數十萬斛以賑饑民明年取常州復屯安吉斷孫儒糧道有功授常州刺史遷淮海都遊奕使轉尚書左僕射未幾王茂章破密州以訓爲密州刺史茂章爲汴兵所追解兵去諸將請焚城大掠而歸訓不可乃封府庫植旌旗於城上自以精兵殿後頃之汴將王檀來攻望見旗幟不敢逼訓竟全軍還卒贈太傅清河郡公

十國春秋

武外續志考正已見人物總傳內

元蔡德榮字景華揚州人元至正十五年從淮南省臣出征累勞授將仕佐郎湖口縣主簿明年春三月揚失守扈鎮南王北奔執之將命以官力辭羈縻于吳卒

梧溪集

明徐司馬字從政小字馬兒揚州人元末兵亂年甫九歲棄道旁太祖得之因養爲子冒國姓旣長出入侍左右及取婺州除總制命助元帥常遇春守吳元年授金華縣指揮同知從副將軍李文忠北伐擒元宗王慶生擢杭州衛指揮使尋進都指揮使詔復徐姓九年遷鎮河南時南北兩京並建汴梁號國家重地帝素賢司馬

故特委任之宋國公馮勝方練兵河南會星象有變占
在大梁乃使使勅勝且曰并以此語馬兒知之爲帝所
親暱如此旣復勅勝與司馬曰天象屢見不可不警大
梁軍民錯處尤宜慎防今秦晉二王還京當嚴兵宿衛
王抵汴時若宋國公出迓則都指揮居守都指揮出迓
則宋國公亦然爾其夙夜小心無忽勅書官而不名其
見倚重蓋畧與宋公埒十九年入覲遂擢中軍都督府
僉事二十五年率師討越雋明年卒追坐藍黨二子皆
獲罪司馬故好文學遇人無貴賤率煦煦謙厚所至撫
循士卒甚得眾心其在浙東河南尤有惠政結納士大

夫情無所不傾公暇退居一室相與講論終日蕭然如
寒素雖戰功不及何文輝而儒雅過之並稱賢將橫雲
史稿顧成字景韶江都人少魁岸膂力絕人善馬槊明祖渡
江來歸嘗從上出舟膠於沙負舟而行從攻鎮江與勇
士十人轉鬪入城被執十人皆死成躍起斷縛仆持刀
者脫歸導眾攻城克之授百戶進堅城衛指揮僉事洪
武四年從臨江侯入蜀蜀平八年調守貴州討羣蠻平
之十四年從潁川侯征雲南爲先鋒首克普定進指揮
使十七年平阿黑螺螄等十餘寨降尾灑蠻二十一年
討乖西諸蠻擒關索嶺賊渠斬士官阿宗進都指揮同

知平康佐都勻諸蠻二十九年佩征南將軍印征木西
誅其酋明年討五開蠻九所破六洞一百二十七寨平
定貴州官至右軍都督僉事建文元年從耿炳文禦燕
師戰真定被執燕王解其縛送北平輔世子居守燕王
卽位封鎮遠侯予世券仍鎮貴州成忠謹涉書史始居
北平多效謀畫終不肯將兵成祖將北巡召至京師輔
太子監國辭時羣小謀奪嫡太子不自安成入辭文華
殿因曰殿下但當竭誠孝敬孳孳恤民萬事在天宵人
不足措意太子領之十二年卒年八十有五贈夏國公
諡武毅孫興祖嗣侯

本傳

蔣貴字大富江都人從燕王起兵積功至衛指揮同知
從大軍征交趾及沙漠遷都指揮僉事掌彭城衛事宜
德二年從總兵陳懷討松潘諸番進都指揮同知七年
命爲參將佐懷鎮松潘九年諸番復叛與總兵方政分
道進討攻破任昌大寨以次討平龍溪等三十六寨進
都督同知充總兵官佩平蠻將軍印代政鎮守其地正
統初召還爲右都督會阿台寇甘涼命貴移師討之明
年春寇駐賀蘭山後貴破之狼山窮追抵石城泉阿台
驚遁已而謀知敵巢將精騎二千五百人爲前鋒出關
疾馳三日夜至兀魯乃阿台方牧馬貴猝入馬羣令諸

軍以鞭擊弓韉驚馬馬盡佚敵既失馬乃挽弓步鬪貴縱騎蹂擊大敗之復分軍爲兩翼轉戰百餘里兒朶只伯以數騎遁走西邊悉平封定西伯給世券六年命佩平蠻將軍印征麓蠻思任發與王驥帥師分三路進破木籠山七寨及馬鞍山象陣功皆第一師還帝親慰勞進封定西侯八年復與驥討思機發緬人聲言送賊貴密焚其舟大戰一晝夜盡俘其妻孥象馬破壘二百燹寇遂平師還賞賚甚渥十四年卒年七十贈涇國公諡武勇貴起卒伍不識字天性朴實忘己下人能與士卒同甘苦出境討賊衣糧器械常身自負囊不役一人臨

陣輒身先之以故所向有功孫琬嗣侯

同上

蔣琬安西侯貴孫也嗣侯天順末佩平羌將軍印總兵甘肅築甘州沙河諸屯堡成化八年召還協守南京兼督操江十二年入總神機營兵上言北京宜於西北隅故址增築土城又言大同宣府諸塞下腴田無慮數十萬請按覈定其科額戢豪右毋得侵奪雖不盡行時論韙之十三年帥京軍防秋大同宣府陳機宜十餘事皆報可二十年出禦邊寇加至太保兼太子太傅卒贈涼國公諡敏毅子驥嗣弘治中充總兵歷鎮薊北遼東湖廣官中外二十年家無餘資

橫雲山人史稿

許貴字用和江都人永新伯成子也襲職爲羽林衛指揮使以武進伯朱冕薦擢山西行都司守備大同西路也先入寇邊城悉殘貴當敵衝人心尤恟懼激戰士以忠義敵來擊敗之進都指揮使景泰元年春充右參將敵寇威遠追敗之蒲州營奪還所掠人畜敵萬騎逼城下禦却之再遷都督同知大同乏馬嘗令死士入賊壘劫馬百餘悉畀戰士士皆樂爲用三年疾還京英宗復辟命理左府事尋調松潘副總兵未抵鎮而山都掌蠻叛詔便道先翦之貴分兩哨直抵其巢連破四十餘砦斬首千一百級生擒八百餘人餘賊遠遁貴亦感嵐氣

未至松潘卒帝爲輟朝一日賜賻及祭葬如制子甯字宗道正統末自以軍功爲錦衣千戶貴歿嗣指揮使成化初充大同遊擊將軍寇入犯與同官秦傑等禦之改督宣府操練移延綏地逼河套寇數入掠孤山堡甯提孤軍奮擊之三戰皆捷寇渡河走明年復掠康家岔甯出塞百五十里追與戰獲馬牛羊千餘而還時總兵房能守延綏無將畧巡撫王銳請濟師詔大同巡撫王越率眾赴越遣甯出西路破敵黎家澗進都指揮同知擢都督僉事佩靖虜副將軍印充總兵官甯起世胄不十年至大將同列推讓不及父友多隸部下亦不以爲驟

七年又敗寇於混忽都河璽書褒獎迤北開元王把哈
孛羅屢欲降內懼朝廷見罪外畏阿羅出讐之徬徨不
決甯請撫慰以固其心卒降之時滿都羅等屢犯延綏
甯率領兵力戰寇不得志乃出西路直犯環慶固原甯
率輕騎夜襲之鴨子湖殺傷甚眾奪馬畜而還又明年
寇入榆林澗與巡撫余子俊敗之滿都魯等大入西路
留家紅鹽池甯襲破其巢進署都督同知與子俊築邊
墻增營堡寇患衰息十八年寇分數道入甯與將士爭
赴之遇伏大敗下獄降指揮同知寄俸羽林左衛弘治
初用薦署都指揮使分領操練踰年卒贈都督僉事甯

束髮從軍大小百十餘戰身被二十七創威名聞異域
性沈毅守官廉待士有恩不屑干進劉甯神英李杲皆
出麾下

橫雲山人史稿

顧溥鎮遠侯成元孫也年十三嗣侯與諸小侯入國學
用薦掌五軍右掖弘治二年拜平蠻將軍鎮湖廣桑植
安撫司土官殘虐溥捕首惡斬之五年冬貴州都勻蠻
七富架作亂梗滇蜀道詔溥充行軍總兵官率兵入萬
討之分五路刻期並進誘誅富架父子斬首萬計加大
子太保增祿二百石入提督團營兼三千營掌前軍都
督府事十八年卒諡襄恪溥清慎守法卒之日囊無餘

資英國公張懋出布帛以殮

本傳

續志考正已見人物總傳內

顧仕隆溥子也嗣侯管神機營左哨得士心正德初出為漕運總兵鎮淮安十餘年以清白聞數請恤軍卒又請開通惠河時不能用及後開之人果稱便武宗南巡江彬橫甚折辱諸大吏惟仕隆不為屈嘉靖初移鎮湖廣尋召還提督三千營加太子太傅掌中軍都督府事論奉迎防守功也錦衣千戶王邦奇怨大學士楊廷和兵部尚書彭澤上疏言哈密失策事由兩人帝怒逮繫廷和諸子婿給事中楊言疏救忤旨事下五府九卿科

道議仕隆言廷和功在社稷邦奇小人假邊事惑聖聽傷國體有詔切責移病解營務卒贈太傅諡榮靖

橫雲山人

史稿

仇鉞江都人世襲指揮同知以功陞指揮使充甯夏遊擊將軍驍勇敢戰正德五年安化王寘鐫與指揮何錦周昂等反鉞陷賊中京師訛言鉞亦從賊閣學士李東陽獨明其不然鉞入城散眾稱病不出陰約侯保勛楊英諸兵至河上從中發為內應又令人私謂何錦宜急出守渡口防決河遏東岸兵錦果出兵留昂守城鉞稱病亟昂來問疾鉞堅臥呻吟言旦夕且死蒼頭猝起捶

增修甘泉縣志 卷十四
殺昂鉞卽披甲跨馬出門一呼諸遊兵壯士皆至遂擒
寘鐔追獲錦並械送京師伏誅論功封咸甯伯食祿千
石充甯夏總兵流賊劉大等稱寇畿輔山東河南諸州
縣皆爲殘破鉞總兵敗之于狼山海上盡殲其眾進爵
爲侯加祿二百石與世券

康熙府志

顧寰嗣父仕隆侯歷僉中左二府事守備南京奉詔讞
獄多所平反嘉靖十七年爲漕運總兵官漕舟以避梓
宮後期者三千而江南北多災傷寰請被災地停漕運
一年令改折色軍民交便又條上漕政七事並施行諸
爲漕蠹者病之遂中蜚語爲給事中王交所劾已按驗

不實復僉右府再出鎮淮安會安南莫宏瀼當襲爲族
人莫正中所嗾遂有議乘釁取安南者乃移寰鎮兩廣
與提督侍郎周延決策送宏瀼還國安置正中於邊安
南遂定桂林平樂徭反殺縣令討平之復鎮淮有禦倭
功入總京營督軍助諸大工作加太子太保復出督漕
召還請老隆慶五年特起授京營總督尋乞休神宗嗣
位起掌左府久之致仕加少保萬曆十年卒贈太傅諡
榮僖自溥至寰三世皆寬和廉靖內行飭謹曉文墨通
賓客世爲督漕善於其職

橫雲山人史稿

喬基世襲揚州衛指揮僉事中武會試第三人性孝友

父嗜鱒魚父歿終身不忍食鱒魚弟九人皆異母出基處之無間言精騎射累官京營參將以病歸嘉靖間倭寇通州當道就家起之屢著戰功復授蘇松參將倭再寇通州又大敗之於狼山下未幾病卒橐裝如洗子孫寄棲官廨萬歷縣志

王繩堯字又元江都人祖父及堯俱以武科舉鄉榜第一天啟壬戌成進士累官四川南路總兵官松潘威茂間大著威望土司奢崇明犯順繩堯設計殄之銷鋒鏑爲錢鏹洞獠咸感其德繩堯少事文墨有儒將風告歸年八十六卒蜀人祠祀之同上

國朝楊捷字元凱其先寶應人以世襲指揮家遼左順治初投山西遊擊擊破太行賊陞副將討江西叛將金聲恒恢復九江南康諸郡陞總兵官鎮九江尋討賊粵東克潮州累加左都督太子少保移鎮揚州改山東提督平東萊之亂福建海氛作再晉少保兼太子太保提督福建水陸軍務至則先攻定海以分賊勢隨合師從惠安搗賊老營克之先是泉州陷於賊旣克制府欲屠之捷力阻得免以功加昭武將軍時賊尙屯漸山等處分十九寨捷先取諸島嶼連建七營調集八槳各船示以欲渡賊受制不能分應遂破十九寨隨咨督撫訂期三

增修甘泉縣志 卷十四
路進攻積寇平以原銜管江南提督事授世襲三等阿
達哈哈番

賜籍江都卒年七十有四贈少傅諡敏壯子懋緒懋紹懋
綸皆官監司孫鑄古北口總兵

以上原志

隱逸

漢應驩淮南人漢初與四皓同被徵不至時人爲之語
曰商山四皓不如淮南一老

嘉靖維揚志

三國劉穎廣陵人精學家巷孫權聞徵之不就

吳志

晉韓績字興齊廣陵人父建仕吳至大鴻臚績少好文
學以潛退爲操布衣蔬食不交當世東土並宗敬焉司
徒王導聞其名辟以爲掾不就咸康末會稽內史孔愉
上疏薦之詔以安車束帛徵拜博士績稱老病不起卒
于家

晉書

唐李孝感江都人博學好古雅修彭聃之道尤以慎篤

著於鄉里考行議德諡曰正隱先生

金薤琳琅

宋王令字逢源廣陵人年十歲晝從羣兒戲夜誦書往往達旦爲辭章雄偉老成家貧乃聚徒天長王安石赴召道由淮南見令大喜以其姨妻之安石嘗與書云始得君文獨愛君旣而見君衣冠履缺語未嘗及已之窮終歲食不茹葷不以銖忽妄售於人世之自立如君者有幾後徙江陰卒著論語孟子解義及蒙求一卷廣陵集十卷 王安石文集

續志考正已見人物總傳內

劉發傳畧曰先生聞一善言見一善行輒歎慕自以

爲不逮事寡姊如事父教姊之孤兒不啻己子歲時祭祀於其考妣必流涕親識饋遺纖介無所受諸生有獻度其家貧雖甚勤不取也

元成廷珪字原常隱居廣陵養母甚謹因不出求仕其與所遊多至尊顯亦莫有薦用之者四方士過淮東或久留或卽去必以君爲之倚君周旋欵洽曲盡其意好讀書尤工於詩有居竹軒集 說學齋

高椿江都人元季避地姑蘇張士誠據吳郡遣幣聘之椿峻拒不受閉戶讀書歸隱興化 康熙府志

明王貞字以道江都人元末避地吳下張士誠授以德

清教諭堅辭不受洪武初歸鄉里葺茅舍以居嘉靖維揚志

王醅字先民揚州人人生而早慧讀書如夙識弱冠善辭賦陸無從李本甯交相引重意不屑也從季父遊長安日醉市樓人求識面不可得會麻大將軍大閱將士先民輕裘快馬馳突演武場引弓破的矢矢相屬掣雙劍飛舞霎忽如崩雪大將軍降階執手欲舉以冠一軍先民笑謝家本書生聊用遊戲耳父母命之室以羸病辭為兩弟納室徧遊吳越佳山水日參內典歸廣陵之慈雲菴顏其室曰寶蕊棲自知時至結跏趺坐而終列朝詩小傳

張奇字正甫江都人初學制舉入郡學久不屑意學詩畫皆極工家貧而傲日與郡之賢士大夫遊中年喜天官象數家言當萬曆季遂移家金陵及馬阮輩竊權寵附者如靡知處士名造焉不報閉門以老預尅死日自題其棺曰飲白水四十餘日遂歿年七十有四康熙府志楊寅江都人府學生永樂初召書令字旗高丈餘一揮稱旨賜金帛鞍馬命署泰州辭不拜後徵入京乃避地于晉十年方回有詩曰洪武仁風萬國柔書生不厭敝貂裘半天雲氣不成雨滿目波光都是秋時盛漫勞思共濟才疎焉敢望封侯放歌古調歸來晚江上無人月

一 鈞 嘉靖維揚志

顧鐸字覺斯江都人幼喜讀書不事生產崇徵甲申聞流寇李自成犯京師憤懣號哭數日不止旋築居江濱種梅花數十株日吟詠其下終其身足不出戶自號遺叟云 康熙府志

國朝雷士俊字伯顛先世涇陽人居艾陵湖士俊幼為諸生後棄去專力于經史百家熟悉古今治亂得失之故辨別君子小人消長進退之機其為文鉢心剝胃既脫稿猶必琢磨再四始出以示人而貧老負氣悲憤得疾以卒所著有艾陵集文二十卷詩二卷祀郡學鄉賢長

洲尚書韓菼贊其像曰宏道其如命休論行與藏先生老披褐已升作者堂艾陵書一編窮理析寒芒一時來學者千里或裹糧而我生也晚不及弟子行俎豆側嘗聞幽微宜闡揚豈不符甲令忍獨私庚桑邗溝舊里居我來炷瓣香其推重如此 雍正縣志

史以甲字子仁邵伯人明按察副使啟元之子幼補郡諸生長乃絕意場屋隱居艾陵湖之東橋墅耕讀自怡足跡不入城市自天文地理以及方伎醫藥百氏之書無不究覽所輯文獻通考抄三十卷學圃隨筆十卷勾股籌算捷法二卷傷寒正宗七卷皆刊刻行世復廣吳

淑事類賦爲七十卷書成而歿子炤述父業著有方輿
槩十五卷曾孫步高雍正丙午舉于鄉

雍正縣志

葉彌廣字博之揚州人生秉異才臨文不假思索爲諸
生時屢試高等貢入太學不樂仕進惟散服逍遙娛情
詩酒康熙十二年纂修通志郡縣聘彌廣任其事咸稱
得人一日雪滿庭堦彌廣欣然浮白賦詩盤桓竟日忽
訣家人曰吾逝矣遂卒年七十有五彌廣同時有強惟
良阮玉鉉皆高曠稱博學士林重之

雍正縣志

續志考正按維良字眞長詩見影園詩稿內善書

北門關帝廟有所書碑玉鉉亦工書有碑在縣

學

宗元豫字子發江都人潮州府判萬化子也萬化卒于
潮元豫行萬里扶柩歸而囊空如滌不能買地以葬乃
疏食不除服餘十年始得葬自是遂不求仕進惟肆力
經史發爲文章具有根柢同郡王巖於人少許可而獨
推元豫以爲脫畧凡近直造古人甯都魏禧嘗與往復
辨論禮制亦歎其難及性廉介不與俗流欸曲雖敝衣
糲食恒自憙也著史論數十篇皆前人未發雜文亦數
十卷別有識小錄若干卷紀廿一史中瑣事爲里人所
得

同上

徐鼎勳字擴生幼秉正直生平恥言財以詩歌自娛所
著成帙尤工於醫惓惓濟人是急晚年力參性宗抱道
而隱超然塵埃之外長子化民辛卯舉于鄉孫源有聲
庠序曾孫兆熊已酉舉人

參康熙舊府志

以上原志

戚晚

南齊劉壽之廣陵人高昭皇后諱智容之父也仕宋為
員外郎后母桓氏夢吞玉勝生后時有紫光滿室以告
壽之壽之曰恨非是男桓笑曰雖女亦足興吾家矣建
元元年尊諡昭皇后贈壽之金紫光祿大夫桓氏上虞
都鄉君

南史

明陳公逸其名揚州人涪皇后父也宋末從張世傑軍
厓山世傑死陳公舟亦敗得脫棲海島糧絕同棲者將
往藺饑山食死馬陳公夢白衣人戒曰勿往食夜有舟
至可共載也寤而如戒是夕又夢紫衣人杖叩之曰起

起舟至矣陳公驚起則已在元帥某舟中蓋公舊所事
統領官降於元將憐而載之也將有令毋留附舟人統
領官匿之艙板下取食飲從板隙投之事將洩忽颶風
大發將懼甚統領官白公有巫術令出而詛之風果止
遂予公飲食送歸揚州公由是棄軍籍避地盱眙以巫
術行久之生二女其季卽瀆皇后也公無子年九十九
始卒洪武二年追封揚王媪爲王夫人立祠太廟東明
年有言王墓在盱眙者中都守臣按之信帝迺命中書
省卽墓次立廟設祠祭署奉祀一人守墓戶二百一十
家世世復而諭翰林學士宋濂文其碑撤太廟東祠

本傳

尹清其先華陰人襲官揚州衛洪武二十七年清授徒
京師選尙舍山長公主高皇帝妃高麗韓氏所生以早
失母最爲高廟所愛賜予特盛清授駙馬都尉卒贈光
祿大夫

嘉靖維揚志

趙輝字孟暘其先宋宗室扈從南渡遂家江都父和府
軍後衛千戶征交趾歿輝方七歲長以廕官備宿衛太
宗命尙太祖寶長公主拜駙馬都尉英宗北狩輝留守
京城卒年八十有二

嘉靖維揚志

附錄百齡人瑞

五代吳琬江都白砂村人壽過一百歲步履康健視聽

不哀州府問勞俱稱翁父元嗣在日義聚不分守臣聞
於朝特賜旌表 神仙通鑑

續志考正白砂屬真州

明倪氏江都人丁元素妻砥節守貞壽至一百有四歲

互見列女傳 舊縣志

田氏江都人丁達妻壽登百歲奉旨旌表建坊小東門

內舊縣志

國朝熊氏閔源妻本歙人居江都康熙辛亥年壽登百歲

孫本正姚安府知府主高皇帝成高皇帝子孫

朱文鼎字公調東鄉許家閘人康熙庚子年壽登一百

有一歲有司上其事奉

旨建坊旌表

劉氏邵伯鎮人許長卿妻雍正甲辰年壽登百歲

以上原志

葉呂氏年百有一歲

卓某妻呂氏道光元年壽百歲

張之蕃妻葛氏年九十三歲及身四世同堂

許自德老壩橋農人年九十二歲五世同堂

戴長國妻季氏五世同堂長國卒年八十八季氏卒年

九十一

徐彤妻韓氏年九十幼年守節撫子成立五世同堂

陸長山妻顧氏年八十八守節撫子成立五世同堂

黃本初妻馬氏年九十八歲

劉履祥妻周氏年三十二守節子同寅同宇氏撫教之

同宇道光庚子舉人氏年九十四歲五世同堂孫謙泰

監生候選光祿寺署正謙和庠生曾孫九人豫猷庠生

元孫四人

以上新增

百藝

甘泉縣志

增修甘泉縣志卷十五

甘泉縣知縣吳鄂峙 張宏運 王熙泰 原纂

甘泉縣知縣陳觀國 揚州府教授李保泰續輯

甘泉縣知縣徐成敷 桂正華 朱公純 增訂

人物寓賢

陳謝哲字穎預陳郡陽夏人也祖肅梁司徒父諱梁右
光祿大夫哲美風儀舉止醞藉而襟情豁然為士君子
所重起家梁祕書郎累遷廣陵太守侯景之亂以母老
因寓居廣陵高祖自京口渡江應接郭元建哲乃委質
深被敬重高祖為徐州刺史表哲為長史荊州陷高祖

使哲奉表于晉安王勸進敬帝承制徵爲給事黃門侍郎領步兵校尉貞陽侯僭位以哲爲通直散騎常侍侍東宮敬帝卽位遷兼侍中高祖受命遷都官尙書豫州大中正吏部尙書出爲明威將軍晉陵太守入爲中書令世祖嗣位爲太子詹事出爲明威將軍衡陽內史秩中二千石遷長沙太守將軍加秩如故還除散騎常侍中書令廢帝卽位以本官領前將軍高宗爲錄尙書引爲侍中仁威將軍司徒左長史未拜光大元年卒時年五十九贈侍中中書監

陳書

唐馬懷素潤州丹徒人寓居江都少師事李善家貧無

燈燭晝探薪蘇夜燃讀書遂博覽經史善屬文舉進士又應制舉登文學優贍科拜郿尉四遷左臺監察御史長安中御史大夫累轉禮部員外郎充十道黜陟使懷素處事平恕當時稱之使還擢拜中書舍人開元初三遷祕書監深爲元宗所禮令與左散騎常侍褚无量同爲侍讀上居別館以路遠則命宮中乘馬或親自送迎以申師資之禮病卒年六十諡曰文

舊唐書

蕭穎士字茂挺與李華同年登進士第李林甫採其名欲召用之時穎士寓居廣陵母喪卽縗麻詣京師徑謁林甫于政事省林甫大惡之卽令斥去穎士忿乃爲伐

增修古身鼎志 卷十五
櫻桃賦以刺云雖先寢而或薦豈和羹之正味嘗與李
華陸據同遊洛南龍門三人共讀路側古碑穎士一閱
卽能誦之是時外夷亦知穎士之名新羅使入朝言國
人願蕭夫子爲師其名動華夷若此終以誕傲褊忿困
躓而卒 同上

竇常字中行其先扶風人結廬廣陵不苟調用講學著書
凡二十年不就王武俊辟杜佑奏授校書郎充淮南參
謀官元和六年自湖南判官擢侍御史轉水部員外郎
歷朗夔江撫四州刺史入爲國子祭酒致仕卒年七十
贈越州都督子宏餘會昌中爲黃州刺史 宏簡錄

楊嗣復字繼之僕射於陵子也於陵爲潤州句容尉秩
滿寓居揚州生嗣復浙西觀察使韓滉見之撫其首曰
名位果踰於父楊門之慶也因字曰慶門七八歲已能
爲文年二十進士擢第二十一又登博學宏詞科釋褐
祕書省校書郎遷右拾遺直史館以嗣復深於禮學改
太常博士開成二年歷仕戶部侍郎領諸道鹽鐵轉運
使三年以本官同平章事領使如故進加門下侍郎武
宗立李德裕自淮南入輔政出嗣復爲湖南觀察使明年
再貶潮州刺史宣宗卽位徵拜吏部尙書至岳州卒贈
左僕射諡曰孝穆 舊唐書

南唐遊簡言字敏中父恭仕吳知制誥卒於任簡言因
傲居廣陵少孤力學以薦入徐知誥幕府齊國建職內
史舍人一時典冊皆出其手筆知誥代吳擢翰林學士
及南唐主璟立晉禮部侍郎獨不附權要事非其任者
未嘗肯言璟重其爲人命判中書省兼吏兵二部選事
裁抑僥倖吳越攻常州執團練使趙仁澤歸錢唐仁澤
不屈吳越王決其口至耳議遣使詰責羣臣畏懾莫敢
往璟乃命簡言簡言不辭未出境召還璟命簡言輔太
子力辭嘉其無徼後福意後主亦由是賢之拜吏部尙
書親治簿書督責嚴峻人或以事請托必固違拂以左

僕射兼門下侍郎平章事卒諡宣靖 十國春秋

宋蘇紳字儀甫泉州晉江人進士及第歷宜復安三州
推官改大理寺丞母喪寓揚州州將盛度以文學自負
見其文大驚自以爲不及由是知名再遷太常博士舉
賢良方正科擢尙書祠部員外郎進史館修撰擢知制
誥入翰林爲學士累官侍讀學士集賢殿修撰知河陽
徙河中卒 朱史

孫侔字少述初名處字正之世吳興人父及仕尙書都
官員外郎簡州倅侔方四歲從其母胡氏家揚州母親
教之侔雖幼已惕然能自傷其孤悲泣力學七歲能屬

增修甘肅志 卷十五
文既長讀書精識元解能得聖人深意多所論撰皇祐
間與臨川王安石南豐曾鞏遊知名江淮俾內行峭潔
少許可不妄喜笑所居人罕識其面非其人造門弗見
雖鄰不與之通詩文嚴勁簡古卓然一出于己自成法
度如其爲人嘗舉進士不中母病且革頗恨不及見其
仕俾嗚咽自誓林下終身不求仕進葬其親蘇州之陽
山廬墓終喪久之親友勸復舉進士皆不聽從其兄觀
往來南方兄卒客居吳門徙吳興丹陽又徙眞州平日
閉門讀書鼓琴自娛體素羸喜親方書治藥餌未嘗傳
經教授而學者聞其風旨多所開悟累爲當路者舉辟

皆不就劉敞知揚州論其賢以爲居則孝弟仕則忠信
足以矯俗而不詭俗以干譽足以扶世而不偶世以自
用求之朝廷呂公著王安石之流也俾初罷舉進士窮
無所歸天章閣待制王鼎以女妻之世多稱鼎爲好賢
俾自奉儉約家人化之然以病日必肉食妻子相對蔬
茹而已閨門之中雍雍如也元豐三年除通直郎致仕
卒有詩四千篇雜文三百篇兄觀亦有學行官至太常
博士

嘉靖維揚志

俞紫芝字秀老金華人流寓揚州少有高行不娶得浮
屠心法所至翛然而工于作詩王荆公居鍾山秀老數

相往來尤愛重之每見於詩所謂公詩何以解人愁初日芙蓉映碧流未怕元劉□獨步不妨陶謝與同遊者是也秀老嘗有夜深童子喚不起猛虎一聲山月高之句尤爲荆公所亟賞和云新詩比舊仍增峭若許追攀莫太高秀老卒于元祐初惜時無發明之者不得與林和靖一流概見於隱逸其弟澹字清老亦不娶滑稽善諧謔洞曉音律能歌荆公亦喜之晚年作漁家傲等樂府數闕每山行卽使澹歌之然澹使酒好罵不若秀老之介靜一日見公云吾欲去爲浮屠但貧無錢買祠部爾公欣然爲置祠部澹約日祝髮旣過期寂無耗公問

其然澹徐曰吾思僧亦不易爲公所贈祠部已送酒家償舊債矣公爲之大笑

石林詩話

趙訓之字誨道秦悼王之五世孫父叔侯訓之登政和二年進士調東平儀曹知平江府吳縣朱勔怙勢役州縣訓之不爲屈勔嘗執數輩詣縣請治訓之悉縱之忤勔遂移疾去宣和末盜起河北訓之屢與人言契丹舊盟未可渝金人新好未可恃未幾金人犯京師訓之居揚州率大姓募士勤王聞都城失守乃止建炎三年知吉州永豐縣孟太后避地處州護衛統制杜彥與其麾下叛楊士雄應之將犯永豐訓之與尉陳自仁簡其兵

增修十身集卷之五
爲二一取間道遶賊後一據地利匿其精兵以誘之賊
至伏發殲其眾會賊別校繼至官兵未成列訓之率數
十輩拒戰厲聲罵賊與自仁俱被害事聞詔贈朝散郎
直祕閣謚忠果自仁通直郎官其子邑人爲立祠宋史
金應者性少剛知義爲文天祥職書司入京補承信郎
天祥奉使被執左右皆散應獨無畔志及脫走鎮江至
淮東以憂憤死焉宋史

元張翥字仲舉晉甯人少負才雋豪放不羈一旦翻然
易業閉門讀書留杭從仇遠先生學以詩文知名薄遊
維揚居久之學者及門甚眾至正末傅巖起薦翥隱逸

召爲國子助教尋退居淮東會朝廷修遼金宋三史起
爲翰林學士國子院編修官仕至河南行省平章政事
仍翰林學士承旨致仕卒年八十二元史

李茂大名人徙家揚州父興壽臨卒語茂曰吾病且死
爾善事母茂泣受命奉母孟氏益謹母嘗病目失明茂
禱于泰山三年復明又每夕祝天乞損已年益母壽孟
氏竟年八十四而歿居喪哀慟聞者傷之大德九年揚
州再火延燒千餘家及茂廬皆風返而滅事聞旌之上
張緝字士明益都膠州人性孝友能詩文至正七年與
兄紳弟經同領鄉薦由澤州儒學正轉泰州幕職棄之

養親居揚州十五年揚州亂緝母姬氏方臥病賊突入臥內舉槍欲刺姬緝以身蔽姬槍中緝脇三日而死

續志考正前已入選舉目內不應又入流寓

蘇大年字昌齡真定人居揚州工八分行書至正間上書於朝官翰林編修著作甚多自號西坡

姓譜

王安義開封人楊達彰德人俱世役鎮南王藩邸寓居揚州張鑑陷揚逐鎮南王北行二人赴難至新城吊橋遇關吉二劫盜達被執安義獨詣求解並執之欲殺二人二人爭死久之關之妻強為勸救遂俱得釋

萬應縣志

明王伯純河東人寓居揚州有別墅近邵伯鎮常讀書

於中輕財好客誼侔古人且才甚高長於詩後領河東

鄉薦

翠屏集

續志考正即前選舉辟薦中之王嘏誤作兩人

楊訓文字克明潼川人元淮海書院山長遇亂遂居江

都吳元年徵為起居注兩遷左司郎中洪武三年官禮

部尚書四年改戶部出參政河南五年卒

列朝詩集小傳

高宗本字茂卿其先保定雄縣人洪武初自鳳陽占籍

太倉之鎮海衛公始讀書起家領景泰癸酉南畿鄉薦

登進士授河南道御史巡視中都倉糧廉武官之強悍

侵漁官廩者寘之法由是豪右斂迹未幾奉勅清理四

增修古身縣志 卷十五
川軍伍摘其匿漏者四千六百有奇及監軍討亂賊暨奉勅整飭甯夏等三邊軍務劾征虜將軍李杲行師不律杲竟坐免以勞績陞河南按察司副使莅政勤敏獄多平反人皆德之尋以老歸於江都遂家焉自號江淮逸叟肆意詩文徵請者無虛日郡大夫延修維揚新志若干卷所著有復齋稿江淮雜稿卒葬揚州嘉靖維揚志
朱世賢字用賓世居山東臨清州累官至少卿剛直不事權貴萬曆初以病乞休依其中表夏氏家于廣陵捐千金以築新城值郡水患復出千金以備賑晚營別墅扁曰小桃源孫珏以畫名同上

王璠字廷瑞陝西人成化甲戌進士累官山西布政使參議時劉瑾專橫縉紳喪氣璠性耿介不能屈因罷職僑居江都子延祀中應天辛卯鄉試知單縣未幾亦致政還父子俱有廉吏名同上

張齊字聖甫長安人原籍興化嘉靖壬子中陝西鄉試己未成進士除真定府推官以治行卓茂召爲戶科給事中陞光祿寺丞會大學士高拱罷論者以齊爲拱所取士併放還齊復家揚州晚習爲詩歌書法宋趙孟頫爲園城西雜蒔花竹與名流談文藝竟日不倦後貧三徙其家去華就樸處之怡然康熙府志

增修古身縣志 卷十五
鄒應龍字雲卿陝西蘭州人其父賈揚州遂家焉初名
貫補揚郡弟子員尋還蘭州易名中嘉靖乙卯陝西鄉
試登丙辰進士由行人擢廣西道御史劾相嵩及其子
世蕃欺罔不法事十餘條時嵩父子擅柄虐焰赫然言
者輒死應龍疏上青衣待罪眾人共危之世蕃出朝盱
衡大言曰何物御史不愛死而及余家事俄命嵩致仕
世蕃卽訊謫戍上嘉應龍忠擢通政司參議朝宇肅清
中外無不想望風采尋陞副都御史巡撫雲南至卽劾
黔國公沐朝弼不法事奪爵旋以征洞獠言者謂其開
釁罷還尋復原官致仕卒 同上

金大車字子有其先西域默伽國人也太祖時以歸義
授鴻臚卿賜姓啟字遂爲金陵人嘉靖乙酉舉於鄉下
第歸偕陳羽伯許仲貽及弟子坤從遊於顧華玉華玉
慎許可極愛重子有屢上南宮不第從其婦於廣陵以
旅病卒詩法襄陽隨州每搖筆執卷頃刻立就羽伯與
子坤掇拾遺詩定次爲百篇 列朝詩集小傳

費經虞字仲若蜀新繁人明崇徵間舉人令昆明土司
吾必奎作亂黔國公討之俘三百餘人將盡殲焉臺使
者檄經虞審理皆脇從之民力請釋之俱得全活陞同
知乞休歸蜀遇亂間道走秦流寓于揚所著有毛詩廣

義二十卷四書字義一卷雅倫三十卷臨池懿訓三卷
註周易參同契三卷子密字此度傳其父業工詩古文
所輯有弘道書十卷正紀百二十卷聖門舊章二十四
卷自著詩古文詞二十二卷 同上

張恂字稚恭涇陽人先世以業鹺家江都崇徵癸未成
進士恂天才雋邁肆力於詩古文詞兼工畫潑墨渲染
備臻妙境 同上

王猷定字于一南昌人以古文詞自鳴流寓維揚士大
夫咸推之 同上

國朝趙開心字洞門長沙人進士起家立朝嶽嶽三掌御

史臺肅然風紀歷官工部尚書卒常寓揚州等于士著
子而汴孝廉官內閣中書名與吳綺埒孫永懷亦能詩
卽綺之壻也 雍正府縣志

胡獻徵字存人湖廣武陵人宗伯學士統虞子也自幼
奉母居揚州讀書砥行仿趙松雪爲行楷書與汪主事
懋麟孫中書枝蔚爲文字交廕補兵部郎擢直隸巡道
遷江蘇布政使大著聲績以病去官養疴無錫卒子期
恒生長于揚舉順天由翰林官歷至甘肅巡撫仍寓揚
州

楊周憲字覺山大興人進士興安令改知新建時值大

師討三逆軍需傍午周憲辦理得宜民皆安堵擢吏科

給事中晉掌印疏陳會議得失安插裁兵選擇論俸乞

廣進士額諸疏俱報可甲子典試江南稱得人後因病

乞休僑居揚州以著書終老卒祀新建名宦 雍正府志

孫枝蔚字豹人陝西三原人幼為諸生遭流寇與其鄉

少年奪戈逐賊落深塹得不死乃走江都逐賈人遊三

致千金三散去既而閉戶讀經史肆力于詩古文辭名

噪海內康熙己未舉博學鴻詞授中書舍人歸著有澗

堂前後續集 雍正縣志

王巖字築夫寶應人初名天祐為諸生乃更今名專肆

力于古文辭其考古論事必引據經傳無一字假借行文根柢於班馬筋力於韓柳諸家客寓江都最久與孫枝蔚雷士俊輩最契合文場後進有執經請業者經其指授輒可名一家故遠近人士翕然稱之著有白田詩文四十卷異香集二卷 以上原志

宜興史承謙菊叢新話曰客游寓公之多無過揚州余見有一老翁客揚最久人為稱九十觴可喜亦可悲也揚當南北之衝富盛甲於他處自縉紳學士訪舊流連適館授粲下逮山林墨客挾一伎之長者因緣栖止綿歷歲時能出其文藻以相標

映地勢物力殆有適相參會者耶錄其殊異而積
久者咨訪尙多未盡焉

唐建中字赤子湖北天門人康熙中編修告歸後客揚
詩社方盛與胡期恆爲韓江雅集中老宿參執牛耳寄
栖宛紅橋都天廟內將二十年酒闌燈炮旅況蕭然欲
歸未果而卒

姚世鈺字玉裁浙江歸安人工詩古文郡人唐改堂守
湖極禮重之遂游于揚性狷介詩文持體格矜重不苟
應宏博試未遇久客張四科家以終張爲刻其屏守齋
遺集時浙東西全謝山祖望厲太鴻鶚金冬心農陳玉

凡撰授衣章吳江王載揚藻並以盛名往來於揚酒社
詩盟極一時之勝讓圃之張與街南之馬賓館逢迎殆
無虛日歷十數年不替胥寓公之焯著者

趙虹字飲谷嘉定人才藻宏富搖筆雲涌寓揚多名士
之游到處逢迎屏障卷軸咸得其言以爲重所作序記
傳跋信手立應如夙構者然四六尤穠麗詩骯髒有氣
岸沈文懋採入別裁集

鄭燮字克柔興化人乾隆丙辰進士官山東濰縣令燮
工詩文詞畫在都有盛名旣謝事歸寓城北竹林寺郡
中後學爭趨之又與四方才彥經過者相應和字多參

古隸作墨竹風枝露葉翛然自成蹊徑詠諧玩俗揮灑淋漓乞其辭翰者盈戶外無貧富咸得其意以去風流至今傳之

史承謙字位存宜興諸生也天才俊拔於書博觀約取不務詭奇詩文皆有體格尤精倚聲之學杜雲川太史推爲近代第一作手客揚二十餘載著有小眠詞四卷靜學齋偶志四卷愛閒齋筆記二卷青梅軒詩話二卷菊叢新話二卷揚推揚州景物雜見所著中適當玲瓏山館盛時意致蕭然自遠

徐沿字社山廣東龍川人年十八爲諸生父官淮安同

知以老乞休貧不能歸遂家於揚父與弟相繼亡授徒自給好奇愛博經史外泛濫百氏每與人論古連誦數百言無錯誤或以隱僻者難之輒衝口酌答肆力爲詩其初沉九淵而矚元冥及成則和已閒靜識者推爲正始然不肯輕出示人性踈涼無富貴貧賤一視之於義利介然也有詩集藏於家王世球爲作傳極推重之子權奇孫達尊達璋皆入籍爲諸生

楊謙字吉人號筠谷嘉定人中年游於揚善詩畫尤精篆刻得李陽冰法與一時諸名流相賡和遇意所契合輒一奏刀得之者咸以爲珍金壇史悟岡嘗敘其印譜

以爲每對玉石凝神正色無情容無浮氣殆不得志而
隱於藝者同邑周笠字牧山畫學大癡氣韻神魄宛然
具體往來江淮間並老於揚謙妻姪朱烜字丙南傳其
篆法爲入室弟子作梅花繁英密蘂生動橫斜攜家就
揚而終

吳珏字並山歙人乾隆癸未進士舉江南壬午解首闈
墨膾炙一時少嘗學於涪安方朴山一變爲順時之文
館於揚之延陵遂不謁選郡中爲科舉之學者翕然趨
風得指授者多脫穎去尋主安定書院又移主梅花先
後幾十數年詩文皆典雅宏麗邑人李道南亦以學行

爲祭酒諸生多出門下李持先正體格而珏於舉業規
時適變一通一介兩家並稱盛焉以病歸遂卒

謝身灌字曉山宜興人父野臣精勾股梅定九算書中
甚推重之身灌其幼子也傳家學嘗作龍尾水車不藉
人牛自然引注不竭欲以之干當事下其法於農田然
工費頗鉅遇有損壞鮮能修理卒不便於用久寓文選
樓以終工段營造往往獨運新思出人意料通西洋奇
器之法能自變化華亭沈學子極嘆其精間作山水亦
不俗

蔣宗海字春農丹徒人壬申進士以中書直機務艱歸

增修古身縣志 卷十五
不赴補年未逾四十也工文績學善鑒別古書揚人爭
迎致就質四庫館開兩淮進書最富皆出宗海遴擇館
中推其精審累主樂儀梅花書院距家僅一江終年不
歸居秋聲館最久晚移寓樗園

丁臯字鶴洲丹陽人僑居甘泉工寫真隨人之妍媸老
少偏側反正無不畢肖著傳真心領二卷書凡二十餘
篇盧運使序之以誠傳其業亦有名撰續心領四卷
按丁當入方技以其流寓附末

以上續志

蔣士銓字心餘江西鉛山人乾隆二十一年進士官編

修士銓以詩古文辭負海內盛名主講安定書院成就
後學甚眾兼工南北曲馬曰琯延士銓於玲瓏山館所
填院本朝綴筆翰夕登瓊瑜揚人盛傳其風流文采云

學經室集

國家有大典禮及工程災賑兵河餉捐上官有所籌畫春
筴起家春性警敏善屬文尤長於詩為總商四十年
江春字穎長號鶴亭安徽歙縣人先世僑居揚州以鹽
皆指顧集事太監張鳳以銷毀金冊逋逃至揚州謁春
春於杯酒閒縛之由奉宸苑卿

特賞加布政使銜好藏書廣結納文人學士咸樂與遊著有隨

月讀書樓詩集三卷從弟昉號硯農候選知府工詩詞所居紫玲瓏閣一時文讌之盛稱二江家云昉著有晴綺軒詩若干卷練溪漁唱詞二卷

學經室續集

陳章字竹町浙江錢塘人精於詩尤工楷法作詩文雖屬稿不作行書乾隆閒舉鴻博因親老力辭不就僑居揚州因就馬氏聘遂家焉時壇坫甚盛同人唱和章咸與焉詩載韓江雅集著有孟晉齋詩集二十四卷文集二卷弟臯字對鷗亦工詩時有二陳之目比之二應二謝著有吾盡吾意齋詞集對鷗閣漫語

吳錫麒字穀人浙江錢塘人乾隆三十九年舉人四十

上

年進士授編修兩充會試同考官補右春坊右贊善

上書房行走轉侍講侍讀升國子監祭酒性至孝以親年八旬乞養歸里主講安定樂儀兩書院所拔多績學礪品之士天資超邁耽吟詠至老不倦著有有正味齋全集七十三卷及詩賦各體藝林奉爲圭臬卒年七十三子清臯嘉慶十八年舉人官江西撫州知府清鵬另有傳

谷際岐字西阿雲南趙州人乾隆四十二年進士改庶吉士授檢討升禮科給事中言事鐫級補刑部員外郎保送知府引疾後主講揚州之孝廉會文堂其學以自

守為本有用為宗生徒進問者惟言熟讀宋五子書反質諸身之所行而已客揚州五年諸生有負笈數千里來者後卒於樗園其殯也生徒素衣執紼異聲同歎

傳略

洪梧字桐生安徽歙縣人乾隆五十五年進士改庶吉

士授編修任山東沂州府知府解組後主講梅花書院

又與郡人結詩會編有韓江酬唱集

家傳

凌廷堪字次仲安徽歙縣人少遊揚州適全椒金兆燕以進士為揚州府學教授開設壇坫落筆如飛即著棕亭詩文鈔者也遇於小玲瓏山館目為曠代奇才時阮文達公尚應童子試與廷堪以問學相長各期束身修

行廷堪擬李白大鵬賦以見意與同人詩酒往來極一時友朋之樂乾隆五十五年成進士改授知縣選甯國府教授廷堪博覽強記識力精卓貫通羣經尤深於禮其禮經釋例即寓揚州時所著也

吳鼐字山尊安徽全椒人嘉慶四年進士入翰林洊升侍講學士少為朱文正公所激賞謂合邱遲任昉為一手駢體文沈博絕麗詩以孟韓皮陸為宗五言長古尤足推倒一世主講梅花安定書院最久同時全椒舉人金望欣字嶠谷工詞賦寓居揚州亦最久

姚配中字仲虞安徽旌德縣人諸生博覽經史尤嗜易

客揚州五年著有周易姚氏學十卷琴學二卷傳略

徐培深字松泉貴州石阡人嘉慶二十二年進士官御史數言事直聲振天下後乞病客居揚州主講梅花書院有年嘗自號梅花主人平日講學不立門戶大旨以敦品力學為宗揚州南北一大都會四方人士游學於此咸傾心引納之以故戶外之屨常滿素工書得晉唐人宗法老益適整咸豐三年揚州失陷移寓泰州年且八十矣自以遭時喪亂貧不能歸遂嬰疾死所著詩文若干卷身後遺稿散佚時共惜之傳略

朱駿聲字豐芑蘇州吳縣人嘉慶二十三年舉人就館

揚州謝氏最久值文匯閣曝書往讀未見之籍有得即錄之大挑選旌德縣訓導丁艱後選黟縣訓導著經義數十種尤邃於許氏說文有說文通訓定聲三十二卷嗣升揚州府學教授因風痺乞解官卒年七十一行狀梅曾亮字伯言江甯上元人道光二年進士官戶部郎中古文紹姚姬傳之緒詩天機清妙皆為同人推服告歸後主講梅花書院著有柏硯山房集傳略程鼎調字梅谷安徽歙縣人生而敦敏幼研經史為文高潔嗜算學好讀孫吳書旁及岐黃之學屢試不售改習齋業生平篤行孝友著有梅谷叢談十卷習醫明鏡

增修七身鼎志 卷十五
六卷配命錄二卷卒年四十九子葆原名官堡字鎮北
幼失怙出繼族叔入儀徵縣籍道光八年舉人十三年
進士會試後改歸原籍官工部虞衡司主事升郎中授
廣東肇慶府知府咸豐五年赴任過浙江奏留襄辦徽
州防務事竣仍僑居杭州十年粵賊陷城全家殉難家傳
陳立字卓人江甯句容人隨父客揚州道光十四年舉
人二十一年進士改庶吉士補刑部主事升員外郎授
雲南曲靖府知府未赴任生平甘淡泊恥干謁與人交
懇款惻怛客揚州久師門誼最篤交游亦多著有公羊
傳義疏白虎通疏證爾雅舊注說文諧聲孳生述句溪

雜著五卷

述行

許宗衡初名鯤字海秋江蘇上元人咸豐二年進士由
庶常改官內閣中書終起居注主事幼孤得力母教內
行最篤賦性豪邁時流露於詩酒閒族人業離於揚延
以課讀往來於揚州最久其詩縱橫跌宕古文尤倜儻
傲詭似胸中有奇氣不可遏鬱者著有拳峯館詩鈔玉
井山館文集府續志
秦芝庭字梧梅浙江人道光年間蒞上官司任善畫工
詩兼精青鳥術言每有中公餘卽以筆墨自遣每值花
月良辰春秋佳日常與集中林堅園大令林春卿布衣

增修古身鼎志 卷一五
何又軒茂才余復初俊秀及方外秋水飲酒賦詩互相
酬唱儒吏風雅雖古之江敦孟郊不過是也著有述懷
詩清新逸秀逼近唐音

唐守道廣西靈川人道光甲辰進士咸豐閒署甘泉縣
事勤政愛民待士以禮乞養後貧不能歸奉母居丁溝
鎮授徒自給士爭師之教人尤以勵行爲急

吳清鵬字笏庵浙江錢塘人錫麒子嘉慶二十二年一
甲第三名進士官順天府府丞解組後主講樂儀書院
晚年卜居公道橋閉戶著書年六十卒子安業道光乙
未舉人博覽經史兼善岐黃建存濟堂施捨膏藥居道

橋終年足蹟不入城市遠近貧病無力醫藥賴吳生活
者以千百計著有理瀹駢文略言四卷行世

鄧石如字完白安徽懷甯人布衣書法直入二王之室
篆隸宗漢魏尤工石刻後人尊其法曰鄧派早年來揚
州人鮮知者迨遊京師名旣振復客揚州求書者幾接
踵焉富商大賈咸以不得爲憾歿後零縑殘墨當世寶
之包世臣論本朝書品以石如爲神品一人分篆草書
爲妙品上一人子傳密字守之能世其家學

包世臣字脊伯安徽涇縣人嘉慶戊辰科舉人江西大
挑知縣以性耽風雅去官書法宗二王晚年得衛夫人

法學益進客揚州時受其學者有楊亮梅植之吳熙載皆名重一時世臣於學無所不窺著有齊民四術中衢一勺管情三義菽舟雙楫行世子家丞拔貢生任宿遷知縣亦善書

阮鴻字北渚附貢生居揚郡父金堂有痰嗽疾鴻侍奉湯藥衣不解帶以孝聞文達公視學山東浙江延請衡文公正明察惟鴻是賴道光元年薦舉孝廉方正辭不受好學賦詩湖山怡性自號蟄室老人著有蟄室詩集山左筆記卒年八十四子三克先充歸公道橋

劉從祀字宏興太學生鎮江籍移居揚獸壩杜門怡養

心慈性直處宗族鄉黨閒戒詐虞而矢渾厚曾孫元楫庠生

以上新增

附錄 咸豐年間揚城三次失陷流寓殉難者甚多間有已入事略者今據各案卷及採訪所得

歲貢生候選訓導姚宗木 山陰人字半林僑居揚郡績

四卷近唐人小令詩二卷咸豐三年城陷時年已七十餘與子監生孝懋同罵賊死妻程氏亦遇害 附貢

生候選訓導鍾兆熊 元和人率勇 八品銜陶瀚 仁和人

害 八品銜江洪作 旌德人絕粒死戚范楊 從九品章春

會稽人與妻王氏子文太 從九品銜呂瑞堂 山陰人

僕婦陶李氏俱被傷殞命 從九品銜呂瑞堂 與母陳

氏妻金氏弟炳堂子增祿又子從九品銜劉振奎廬州人

女四口一門九口同時殉難安東人同妻陳氏僕

同殉難九品銜徐樹本婦王氏俱絕粒死職員嚴庸

徐氏同人與妾職員陳廷錦絕粒死職員余瀛徽州人諸

生顧灃上元人與弟諸生澄諸生桂楨句容人與姪袁

正進丹陽人與嫂史氏弟許袁氏幼女四姑孫女貴貞

俱絕粒死妻朱氏諸生徐燧錢塘人少傳文穆公本之

長女秦袁氏被殺諸生徐燧會孫城陷自縊死妻吳氏

弟煥弟絕粒死童文進大興人與長子諸生桂次子復

死諸生徐木生錢塘人與妻吳氏俱被殺死弟諸生

徐義芳山陰人廩監生曹籛丹徒人與妻朱氏絕粒死監生嵇榮培

無錫人字藥園能詩大學士監生朱建堂無錫人與子

文恭公璜之孫舉家自縊死

並絕粒死監生郭玳丹徒人與妻李氏監生吳楫歙縣人與

照女秀姑子婦洪氏孫元壽監生謝珏餘姚人與妻喬

孫女玉姑桂姑並絕粒死浙江人與妻王氏子德基茂基

俱絕粒死保監生馮文吉女大姑銀姑蘭姑止姑姪信初

俱絕粒死監生李國來溧水人監生王東山丹徒人監

生程惠葑安東人監生何榮棣大興人罵監生徐榮春

餘姚人監生周雋貴池人陳書禾會稽人罵賊被殺妻

絕粒死姑新姑同時被殺女邵荻漁山陰人游幕江都與

大姑二姑自縊死邵荻漁庶母楊氏俱絕粒死鄒錫

炎丹徒李雲裳江甯人與鄧錫洩同被殺大營文童陳元

桂元和人絕粒死陳建初無錫人城陷不食死子志忠

陳瑞雲天長人與母節婦蔣蔭淇丹徒人與母孫氏弟

趙氏俱自縊死蔣蔭淇某寄居外祖母家俱

絕粒夏志純丹徒人投水死生母劉氏叔譚大生州和

人與妻鄭氏子婦唐錦榮常州人絕粒死妻吳氏被程

朱氏俱絕粒死唐錦榮殺僕吳廷照亦絕粒死虞人德

丙昌無錫人鄭基富嘉興人罵民人鄔聖瑞粒死子德

謹被劉某旌德人絕粒殺子謝方喜溧水人與姪丁遐

齡上元人與姪慶保絕粒死弟汪永祥全椒人被刃

縊子某女大嚴茂虎丹徒人後殉難妻某氏自縊子嚴治

姑絕粒死嚴茂虎五九女大姑二姑並絕粒死歙縣

祥丹徒人被殺弟楊承祖如臯人被刃死鄭致和人歙縣

殺劉泮元旌德人江文輅歙縣任錦祥旌德人張益齋山西

周廷琮餘姚人左萬忠濟南人朱洪裕丹徒人被殺以汪大昕

丹徒人被賊斫朱塚自縊死陳朗山蘭谿人俞士儼和

折右臂絕粒死朱塚自縊死陳朗山自縊死俞士儼和

人與妻某氏嫂某氏俱絕粒死妻之姑母孫文學丹徒

某氏妻之姪婦某氏寄居其家亦絕粒死歙縣人與妻某

瓦木工為業不肯行遂絕粒死汪茂堂歙縣人與妻某

屋賊脅入館不肯行遂絕粒死汪茂堂歙縣人與妻某

楊永齡鎮江人自此至楊端堂丹徒吳藝之丹徒程

春霆淮安劉子珊紹興饒直庭歙縣陳炳桁慈谿江月

培歙縣袁嘉和當塗林衡齋丹徒沈啟盛丹徒黃有章

歙縣黃錦中歙縣胡宏才太平王福六合人傭鹽知事

絕粒朱貴天長人傭鹽知事趙壽林家受傷後

請諸生朱修吉溧水人與弟監生朱近山元和人監

賜卹錢塘人罵賊被所投井死妻黃陳邦慶字若農

生徐珍氏抱幼子並女大姑同人井死陳邦慶字若農

工文為幕府書記晚年寓揚城陷罵賊被剖九品銜潘

琳大興人在保衛局教張文遠六合人傭於蕭姓家絕

年殉難由兩江忠郵職員余瀛前蘇州人絕食死與監生

王方辦團剿賊皆陣亡湯永齡前丹徒人絕粒死與晏藝

之前吳藝之似一人汪月培歙縣人絕粒死與前江月

殉難熊石揖湖北人游幕甘泉咸候補縣丞閣金壽前

都縣光涵次子罵賊被殺從九品銜鄭兆松上元人諸

生陳道熙被錢塘人諸生李登甲絕粒死監生戴杏人與

妻李氏妾江氏子鎮保女監生程惠豐安東人被害與

領弟一家五口積薪自焚監生朱均蘇州人監生吳廷楫

不之並王日華絕粒死監生朱均蘇州人監生吳廷楫

歙縣人洪煦歙縣人謀為內應書被賊獲賊呂長祥旌

絕粒死洪煦以鐵梭去其肉備極慘酷而死呂長祥旌

人以書投大營請兵破城被賊搜出文童臧椿桂丹徒

分屍兩半一釘天甯門一釘便益門文童臧椿桂丹徒

焚文童曹照天長人孫守源蘇州人罵賊被殺害章

壽亭紹興人與妻吳香輪子某俱絕粒死方冠瀛桐

人被韓升常州人與子竹李敬業休甯人自此張順

楨休甯張晉藩丹徒錢子珊紹興劉祝三丹徒鄔文祥

餘姚茅積庵丹徒睦同年丹陽睦慶丹陽張啟海丹徒

自熊石揖至此皆新採

右府續志原文載入流寓內茲仍依類附錄於此

漢吳普廣陵人從華佗學普依準佗療治多所全濟佗
語普曰人體欲得勞動但不當使極爾動搖則穀氣得
消血脉流通病不能生譬猶戶樞終不朽也是以古之
仙者為導引之事熊頸鴟顧引輓腰體動諸關節以求
難老吾有一術名五禽之戲一曰虎二曰鹿三曰熊四
曰猿五曰鳥亦以除疾並利蹄足以當導引體有不快
起作一禽之戲怡而汗出因以著粉身體輕便腹中欲
食普施行之年九十餘耳目聰明齒牙完堅

方伎

萬歷府志尚載吳術士趙達謂達為廣陵人

按三國志趙達傳達河南人少從漢侍中單
甫受學謂東南有王者氣可以避難故脫身
渡江治九宮一算之術至吳主傳黃初三年
註魏文帝觀兵廣陵吳人大駭權令趙達算
之曰曹丕走矣然吳衰庚子歲云云萬歷志
所載事想本於此其以達為廣陵人竟不知
何據今考正刪去

隋法喜平素說吉凶之徵有如影響煬帝招之至揚州
宮中樹一堂新成喜匆匆升堂觀覽俄驚走下階曰幾
乎壓殺其夜大雨堂崩續高僧傳互見仙釋

唐來恒廣陵人護兒子擢進士第坐褚遂良事貶庭州
刺史與弟濟皆以能書名時虞世南子昶無才術歷將
作少監故陸元方曰來護兒兒把筆虞世南男帶刀寶蒙

述書
賦註

續志考正來恒濟兄也會相唐高宗不應入方伎

王嗣宗唐秘書少監紹宗兄善書書斷

薛滿揚州人李龜年至岐王宅聞琴曰此秦聲良久曰
此楚聲主人入問之則前彈者隴西沈妍後彈者揚州
薛滿也然藜餘筆

廣陵曹參軍李湊揮毫造化動筆合真子女衣服萬品

千門筋脉連帶形狀奇絕天寶年中過之古人譚簡工醫術相國崔公慎由廉察浙西左目皆生贅疣如息肉欲蔽瞳神視物極礙諸醫方無驗一日淮南判官楊員外牧自吳中赴職召饌于中堂因話揚州有穆中善醫眼爲我白府主崔相國鉉致之楊君許諾後數日得書云穆生性麤疎恐不可信有譚簡者用心精審勝穆遠甚遂致以來既見白崔公曰此立可去但能安神不撓獨斷于中則必効矣崔公曰如約譚簡又曰須用九日清明亭午于靜處療之若其日果能遂心更無憂矣是時月初也至六七日間忽陰雨甚譚生有憂色

至九日天大開霽問崔公飲酒多少崔公曰量雖至小亦可引滿譚生大喜初公將決意用譚之醫惟語大將中善醫者沈師象師象贊成其事是日引譚生於使驛北樓惟師象與一小豎侍行左右更無人知者譚生請公飲酒數盃端坐無思俄而譚生以手微捫所患曰殊小事耳又覺以手拔之雖痛亦忍又聞動剪刀聲白公曰此地稍暗請移坐中庭師象與小豎扶公而至於庭坐既定聞櫛焉有聲先是譚生請好綿數兩染紅至是以紅綿拭病處兼傅以藥遂不甚痛譚生請公開眼看所贅肉大如小指堅如乾筋遂命投之江中譚生立以

地修其身原元 卷一五
狀報淮南崔相國復書云自發醫後憂疑頗甚及聞痊
愈神思方安後數日而徵詔至金陵 因話錄
石旻有奇術在揚州段成式不隔旬與之相見言事十
不一中家人頭痛噫咳者服其藥未嘗効也至開成初
在城親故往往說石旻術不可測寶歷中石隨錢徽尙
書至湖州嘗在學院子弟皆以丈呼之於錢氏兄弟求
免湯餅時暑月繼師數日方獲因與子弟共食笑曰可
留免皮聊志一事遂訂皮於地壘塹塗之上朱書一符
獨言曰恨校遲恨校遲錢氏兄弟與語之石曰欲共諸
君共記卯年也至太和九年錢可復鳳翔遇害歲在乙

卯 酉陽雜俎

史白廣陵人仕諫議大夫善飛白

書苑菁華

史浩字惟則白子官至殿中侍御史籀篆八分如王公
大人進退有度呂總評浩書謂如雁足印沙深淵躍鯉

書史
會要

竇眾述書賦云史侍御惟則筆優世業階乎籀篆古
今折衷大小應變如因高而矚遠俯川陸而必見

李含光廣陵人孝感之子少工篆籀而隸書尤精客嘗
賞之謂賢於其父因投筆不書平生所著有本草音釋
二卷老莊周易學記義畧各三篇內學記二篇道學傳

續志考正又入仙釋

李該廣陵人呂溫地志圖序云廣陵李該博達士也學無不通尤好地理乃裂素為方儀據書而畫命之曰地志圖觀其粉散百川黛凝羣山元氣剖判成乎筆端苑文

英華

續志考正已見文苑內

陳庶揚州人師邊鸞花鳥尤善布色

圖繪寶鑑補遺

石藏用廣陵人仕唐為羽林大將軍明于歷數嘗謂家人曰天下將有事而蜀為最安處乃去依其親眉州刺

史李隔遂家焉石揚休其後也

萬歷縣志

錢亮江淮布衣也人皆稱為錢處士天祐中寓居昇州宿楊姓家中夜忽起曰地下兵馬相鬪云接令公聒我不得眠人莫之測明日徐溫至金陵時無有豫知者又語人曰金陵王氣復興當有申生子應運於此及徐知誥為昇州刺史亮謁之退謂左右曰建業之地復興帝業後溫徙知誥於潤因廣修解署潤布城隍期已當之亮曰此故修道主也至南唐禪代先主實生于戊申與亮言合封亮為霸國先生時有圖亮之貌者亮見曰吾反不若此嘗對聖人未幾一僧取圖置誌公塔中已而

南唐先主復取入宮陳於內寢其言遂驗亮又善爲讖
語說將來事末年言李氏之祚曰髣髴之間倍蓋楊氏
有淮南四十六年而李氏三十九年髣髴不遠也或謂
楊氏自改元至易姓止二十年故云倍之耳

十國春秋

江淮間有術士姓吳者某將赴宏詞科謁之術士曰公
頭上燄光高二必登高第後果然

山堂肆考

淮南畫工者失其姓名晉王李克用之有河東也太祖
恨不識其狀貌密使畫工詐爲商人入其境寫之及至
河東有發其謀者擒之晉王初甚怒旣而謂曰吾素眇
一目試召使圖之觀其所爲何如俄畫工至晉王按膝

厲聲曰淮南使汝來繪吾眞必畫家之尤也寫吾不及
十分墜下卽汝畢命地矣畫工再拜下筆時方盛暑晉
王執八角扇因寫扇以半障其面晉王曰是諂吾也遽
使別圖之又應聲下筆繪其背弓撚箭之狀仍微合一
目以審箭之曲直晉王大喜厚賂金帛而還

同上

潘辰往來江淮間自稱野客常依海州刺史鄭匡國不
甚見禮館之馬廄旁一日從匡國獵近郊匡國妻行至
廄中因視辰所居四壁蕭然葦席竹筥而已發筥覩二
錫丸亦頗怪之辰歸大驚曰何物婦人觸吾劍賴吾攝
其光芒不然身首殊矣或以告匡國悚然曰殆劍客也

求學其術展曰姑一試之乃俱至靜院探懷出二錫丸
置掌中俄而氣出指端如二白虹旋繞匡國頸有聲錚
然匡國汗下如雨曰先生之術神矣觀止矣展笑引手
收之復爲錫丸匡國表薦於烈祖召居紫極宮數年卒

陸游南
唐書

申漸高不知何地人事睿帝爲樂工常吹三孔笛賣藥
于廣陵市乾貞時按籍編括而關司歛率尤繁商人苦
之會都城亢旱中書令徐知誥謂左右曰近郊頗得雨
何也得非刑獄有冤乎漸高作諧語進曰雨畏抽稅不
敢入京耳知誥大笑明日下教弛額外稅信宿大雨霑

洽太和中知誥與弟知詢不相能一日手金卮引鳩賜
知詢曰願弟壽千歲知詢心疑之取它器均酒之半跽
進曰兄分享五百歲知誥色變左右莫知所從漸高舞
袖升堂掠二酒併飲之懷金卮趨出知誥密遣人以良
藥解之已腦潰卒 十國春秋

宋陳偕淮南廣陵人家故饒富財而與其弟獨喜學畫
其後伎日以進家日以微遂以爲業士大夫旣喜其畫
且愛其爲人往往稱之然非偕之好也其言曰予從事
於茲有年矣凡古今之畫雖敝縑裂素之餘未嘗不學
一不可於意輒復易之砥筆濡墨欣然忘勞蓋是時余

增修古身集卷十一
方以畫爲事固其勢不得不然乃今思之亦良苦矣且
物之有形如浮埃聚沫來無所從去無所詣一興一償
於無窮之中而我汨汨然隨而畫之豈不惑歟顧家貧
無以給衣食聊復俛仰於其間至于得失精粗不復經
意也
淮海集

東坡嘗贈偕畫雁詩云君從何處看得此無人態又
云作書問陳子曉景畫茗雪

陳直躬偕子能世其業嘗曰昔宋元君時畫圖有一吏
解衣槃礴元君曰是真畫者也夫解衣槃礴固倜儻之
所得閒暇之所好也元君乃以爲其畫其意安在有得

於此然後可以言畫

同上

鄒放淮海人善醫宋秦觀贈詩曰百工皆聖作惟醫有
書傳緒餘起人死妙處實通天鄒子本淮海弱齡加討
研岐扁逢卷中遂知百病先往歲遊京室公侯紛薦延
國工不敢妬遣兒求執鞭晚棄本州役青衫鬢蕭然臨
衢開大肆旁午送金錢嗣子頗不凡文場早周旋行期
拾青紫善積神所憐

同上

衛朴淮海人精于歷術一行之流也春秋日蝕三十六
諸歷通驗密者不過得十六七唯一行得二十七朴乃
得三十五唯莊公十八年一蝕今古算皆不入蝕法疑

前史誤耳自夏仲康五年癸巳歲至熙甯六年癸丑凡
三千二百一年書傳所載日蝕凡四百七十五眾歷攷
驗雖各有得失而朴所得爲多朴能不用算推古今日
月蝕但口誦乘除不差一算

妙應方相法入神高宗駐維揚張魏公俊居臺院應方
館其家一日歸自外云適見城中人有死氣者什七八
不應如是之眾此必有虜至之兆宜早勸上渡江張素
神其術因入奏上意猶欲觀燈未幾粘罕至翠峯車駕
亟行城中死者果無數萬曆府志

許叔字知可維揚人紹興二年進士第六人以藥餌陰

功見於夢寐事載夷堅志晚歲以生平已驗成方并記
其事實作本事方十卷文獻通考

續志考正許叔微脫微字真州人

祁宰字彥輔江淮人宋季以醫術補官金破汴得之以
隸太醫累遷中奉大夫太醫使宏簡錄

本傳海陵在位宰數被賞賚常感激欲自効會將伐
宋宰欲諫不得因元妃有病召往診視既入見卽上
疏言甚激切海陵怒命戮於市世宗卽位贈資政大
夫復其田宅章宗詔官其子忠勇校尉平定州酒監
太和初詔定功臣諡有司拘文以職非三品不在議

諡之例尚書省掾李秉鈞上言當海陵時居高官食厚祿者皆畏罪泐忍曾不敢申一喙畫一策以爲社稷計卒使立名死節之士顧出于醫卜之流亦不可少矣夫有非常之人當待以非常之禮乞詔有司特賜諡以旌其忠制可下太常諡曰忠毅

李澥字公渡揚州人工山水

畫法年紀

劉允文廣陵人工佛像

歷代畫姓氏韻編

王克明字彥昭以術行江淮鍼灸尤精胗脉有難療者必沉思得其要然後予之藥有非藥之過過在某事當於其事治之言無不驗後再從呂正以使金金接伴使

忽被危疾克明立起之却其謝張子蓋救海州戰士大疫克明時在軍中全活幾萬人子蓋上其功力辭克明頗知書好俠尚義常數千里赴人之急初試禮部中選累任醫官王炎宣撫四川辟克明不就炎怒劾克明避事坐貶秩後遷至額內翰林醫痊局賜金紫紹興五年卒年六十一

宏簡錄

續志考正克明宋史有傳本饒州樂平人徙湖州烏程縣以術行江淮間特偶至揚耳王炎宣撫四川在乾道五年何緣以紹興五年卒宋史云紹興乾道間名醫而又云紹興五年卒果卒于紹興五

增修甘泉縣志 卷十五
年則去乾道尙隔廿餘年宏簡錄與宋史並誤
揚州名醫楊吉老其術甚著其郡一士人狀若有疾不
名其何等病謁之楊曰君熱證已極氣血消燦且盡自
此三年當以背疽死不可爲矣士人不樂而退聞親識
說茅山觀中一道士於醫術通神但不肯以技自名未
必爲人致力士人心計交切乃衣僮隸之服詣山拜之
願得執薪水役道士喜留置弟子中誨以讀經晝夕祇
事左右頤指如意歷兩月久覺其與常隸別呼扣所從
來始再拜謝過以實白之道士笑曰世間那有醫不得
病汝試以脉示我纔診視又笑曰汝便可下山吾亦無

藥與汝但日日買好梨一顆如生梨已盡則取乾者泡
湯飲之仍食其滓此疾當自平士人歸謹如其戒經一
歲復往揚州楊醫見之驚其鬚貌腴澤脉息和平謂之
曰君必遇異人不然豈有痊安之理士人以告楊楊立
具衣冠焚香往茅山投拜蓋自咎學之未至也
夷堅志
荆大聲江都人貧去鄉里貨卜于臨安以明歷入太史
局歷靈臺郎終于春官大夫判太史局賜金紫
姓譜
續志考正府志作高郵人

元王仲明江都人善醫平章廉希憲疾世祖召仲明治
之未卽行人強之曰君能起廉相國是惠及天下也仲

明邁往投以一七立愈世祖欲官之辭不就 江南通志

蕭月潭淮南人善白描道像畫之傳世者三清像三北

帝像一太白像二醉真圖二七曜像一 繪事備考

維揚王有恒避亂居東吳三十餘年所至寓舍以聽雨
蓬名之多學能琴而善飲醉則鼓琴自娛自號曰醉琴
謝應芳贈以詩曰昔年家住揚州市雨聲不入弦歌耳
居吳聽雨三十年客舍如篷臥篷底篷窗晝暝雲抹漆
滴滴點點疎復密絕似瀟湘夜泊時半雜風波響蕭瑟
有時聲急如建瓴有時珠玉聲琮琤看山便作施樓倚
兩耳洗來心骨清心骨之清豈不好一點鄉心忘未了

天中玉樹無雙花夢魂日夜長飛遶只今二十四橋月
依舊玉簫聲不絕一帆風送到瓜州聽雨孤篷聲又絕

龜巢集

王禮字禮仲揚州人篆宗張謙中 書史會要

盛昭字克明揚州人竹石師文湖州 佩文齋書畫譜

陳君佐宿州人居揚州山水師馬遠夏圭墨戲師徽廟

圖繪寶鑑

鄧學可維揚人留心翰墨有聲於時 書史會要

劉漢卿郎中患牙槽風以之額穿膿血淋漓醫皆不效
在維揚有邱經歷妙鍼法與鍼委中及女膝穴是夕膿

血卽止旬日後頷骨蛻去別生新者其後張師道亦患此證仍用此法鍼之而愈殊不可曉也邱嘗治消渴者遂以酒醕作湯飲之而愈皆出於意料之外

癸辛雜識

蘇大年字昌齡號西坡真定人居揚州竹石師蘇東坡

窠木師廉宣仲

圖繪寶鑑互見寓賢

明陳君佐維揚人能醫善滑稽洪武間事上出入禁中上嘗呼之不名一日上問朕似前代何君君佐對曰陛下酷似神農上曰朕聞神農形體極異卿何以言之對曰陛下不似神農如何能嘗百草蓋天下未定時出軍與士卒皆掘草根而食上亦同其甘苦故云爾上大笑

罪雪錄

按圖繪寶鑑所載元人與此同姓名而事蹟各異又康熙府志載明陳君佐江都人善方

脉洪武初爲御醫永樂間棄官着黃冠市藥

武當山中以易卜人吉凶多奇中並不詳其

善畫是一是二以俟考核

蜀人通眞子註叔和脉經已行于世而其道未行遂歷湖漢江浙亦未有目之者及至淮之邵伯鎮旅于僧舍亦無聞于人又將轉而之他主僧聞之曰子若不設肆誰則知之市有寺屋吾給子具請試爲之旣而醫道大

行家產豐足一日主僧將化召其前來密語曰子前生
在此鋪街鑿井今享此報更宜積德言訖而化推篷寤
語
蔣用文淮南人儒而精於醫初以戴原禮薦入太醫院
為御醫永樂中陞院判極蒙寵異仁宗在青宮尤眷待
之後公以年老卒於京師仁宗特加院使賜諡恭毅命
中使護喪以歸國朝太醫院無賜諡者有諡唯公一人
而已都公談纂

續志考正用文儀真人見楊士奇東里集

楊一洲字伯海揚州人山水小幅可觀謝茂秦贈以詩
有畫逼輞川工王維信可同之句畫史會要

廣陵魏文壁號野鶴自云泛海六七日至蓬壺山訪異
人得藥與方遊京師明儲懽贈詩云昇仙樓高胡不住
回首蓬萊墮烟霧縞衣化盡帝京塵何年却返三株樹
青精石髓毛骨換流水桃花人世暮曩為砥柱蛻為梁
中有飛仙往來路愛君小隱蕪城市傾蓋壺公即如故
萬金良藥到長安不羨金莖一杯露海波萬里秋風餘
豈願得食馴堦除爾來貽我太古訣茫昧不是人間書
遠遊賦罷脫身去蜉蝣起滅嗟紛如柴墟文集
蘇詳號小泉揚州人善畫人物山水畫史會要
德音建隆寺僧精數學嘗有叩門者僧呼曰東鄰某借

地仙十身鼎志 卷一 五
鋤執出與之開門果然一日方飯有人問其父疾曰當
即愈飯畢又有人問疾曰淹久不瘥有頃又一人問疾
聞厨滌器聲曰噫死矣已而皆如其言其徒詢其故曰
始吾方飯飯則生理知當生既飯則漸去食知其淹久
滌器則入櫃櫃棺像也以是知其死矣 嘉靖縣志

續志考正又見仙釋內

史政揚州人能寫照 書畫史

李遴字振振江都人以畫名 畫史會要

林廣廣陵人山水人物學李在得瀟灑活動之趣 圖繪寶鑑

續纂

吳承嘉江都諸生幼孤事寡母極孝嗜古學尤研心六
書自篆籀八分行楷擘窠正草靡不精妙一時隴墓碑
版金石之文多出其手 萬曆府志

仰廷宣號筠石維揚人凡作山水先以水噴淨几鋪紙
於上用筆點染以取烟潤之態萬曆中來豫章不甚得
售乃棄去隱名市肆 畫史會要

張奇字正甫廣陵人善畫山水人物花卉兼工篆籀印
章 無聲詩史

方選字以賢江都人精于醫稍有贏餘輒以給宗鄰之
困者嘗拾遺金子道訪其人歸之仲子新精弈有神解

選嘗與客弈新甫六七歲置膝上觀之辟咄語選客某道瑕可攻不信客竟備不敗比收局客戲謂新曰童子知吾瑕乎吾不畏攻也新再布子如前不差一道指選攻之客大敗比卯角郡中人皆無敵手人羣訝其異王世貞過郡邀新與其客李時養弈時養者海內稱第一品也新初遜李一子翌日則已雁行矣

萬歷縣志

汪浩字小村揚州人工山水人物

無聲詩史

國朝唐志契揚州人以諸生精繪事興寄所託便齋糧遊名山水經月坐臥其下故畫筆瀟散清遠有元人風味弟志尹精花鳥得呂紀王偕之傳時稱三唐志契子曰

致補博士弟子員能世其家學

江南通志

按志契所著繪事微言頗得六法之蘊見姜

紹書無聲詩史

宗灝字開先江都人工山水

歷代畫家姓氏韻編

朱珏字二玉江都人工人物山水花草

畫法年紀

李翊如字祚銘江都人工山水

歷代畫家姓氏韻編

張翀字子羽廣陵人工人物山水花鳥

畫法年紀

桑牙字楚執揚州人工山水

歷代畫家姓氏韻編其前傳見文苑

續志考正已見文苑內

王璽字崔里揚州人工山水蘭石

同上

王雲字漢藻揚州人工花鳥仙山樓閣康熙間待詔畫

苑繪 南巡圖 萬壽圖

葉彌廣字博之江都人貢士善書 遺民詩小傳

續志考正已見隱逸內

李寅字白也揚州人工山水

宋曹字彬臣別號射陵淮南鹽城人官中書善書法不

應徵車遨遊江淮間晚年好養生術 同上

譚宗字公子浙江餘姚人客揚州飲李寅家值俗客至

徒坐面壁待其人去方入座善書人如其意雖厚幣

亦卻其性然也 同上

胡春生字夏昌別字赤岸崇徵末隱於岐黃善作水墨

山水寸軸萬里烟雲變態隨手出沒世爭購之著書數

百篇 遺民詩小傳

查士標字二瞻休甯人居江都以書著名尤長于畫摹

倪瓚得其遠神而性迂好潔亦復似之求畫者視其人

可交俄頃即應否則投以重幣強要致之終不應也流

傳人間書多畫少雖片幅人爭貴之 雍正縣志

蕭晨字靈曦江都人少善讀書不習制舉工于繪事尤

以人物擅長其法以取神為上而不屑屑趨步前人所

作雖粗幅亂頭皆有丰韻四方人爭購之晚好為詩多

逸致在倪瓚沈周之間 同上

湯禾字秋穎喜稱法古人詩畫曾繪香阜寺菩提樹圖

進呈

御覽 江都舊志

趙有彬字岷江郡增生以文行著尤長于字畫山水墨蹟與龔半千查二瞻兩山人相頡頏四方人競購之

續志考正已見孝友內

按嘉靖萬厯府縣志康熙府縣志所載方伎不過數人雍正縣志錄十三人雖嫌疎畧已較倍前志矣今共採六十六人內載僧法善

德音二人羽士李含光蕭月潭二人方外也

而工於伎卽以伎傳之錄所長也外若李湊

申漸高妙應方王克明等並以術往來維揚

亦一例編入猶人物之載寓賢也至如三國

皇象晉戴若思唐王紹宗李邕李磎宋徐鉉

並工書法書史論之詳矣願以諸公生平梗

概具詳載人物傳中不復贅述又陶宗儀書

史會要載揚州人盛紹先字克振孔復貞字

鳧生江都人徐尙德字仲修三人皆不詳事

蹟聊爲附名於此又劉教叔異苑載胡道洽

者自云廣陵人好音樂醫術之事體有躁氣恒以名香自防唯忌猛犬自審死日誠其弟子曰氣絕便殯勿令狗見我尸歛畢覺棺空開看不見尸體時人咸謂狐也此事頗類妖異故亦從畧云 以上原志

文命時名二訓以字行工墨蘭瘦筆乾墨運以中鋒秀勁拔俗花藥疎朗別具神韻時令人有世外之思虞沅字晚之善花草翎毛勾染工整賦色妍雅得古人遺法

汪一元字兆初性至孝隸學官二十年矜名負氣不苟

取精算術嘗握粟以箸算凡用時憲法逆推十數年與臺厯脗合終於乾隆十四年四月先期預刻時日

袁江字文濤善山水尤工界畫中年得無名氏所臨古人畫稿遂大進嘗供奉 內廷

方士庶字循遠號小師道人本歙人家於揚畫山水得訣於黃尊古用筆靈敏氣韻超遠駘宕有出藍之美工詩與諸名流相酬唱同時有汪南鳴者亦僑揚畫極工嘗作江山烟雨圖名輩多題咏之與士庶並有名

程兆熊字孟飛先世歙人工書翰於大小篆八分草隸各盡諸家體勢而篤好虞永興波磔戈啄無不縱歛如

增修甘泉縣志 卷一五
志一時爭迎致之名園甲第匾署楣楹屏障咸待以爲
榮兩童子夜磨墨供揮灑漏盡不休性方雅絕俗自遠
乾隆甲申卒僅中年耳

王楠字配文邵伯人諸生工詩文於畫有神解善寫生
自黃筌徐熙外別開生面性高介蕭然閉戶焚香煮茗
自樂不輕爲人作故流傳殊少有得其尺幅者輒寶弄
之

管希甯字右銘高介孤潔畫得文衡山眞傳山水人物
花卉並入工妙家貧以醫爲業人欲得其畫者不能以
貨取雖遇晨炊不繼不顧也嘗有一顯者強索之心薄

其人堅不應幾爲所中自號金牛山人下簾閉肆蕭然
如在塵埃之外同時交重其品尺幅流傳爭寶貴之題
畫詩尤雅飭惜多散逸時蘇人袁慰祖字竹室性高逸
筆意與希甯相近多作合幅人不能辨客於揚而終

羅聘字兩峯少學詩於金冬心善畫尤工神鬼所作鬼
趣圖海內名流題咏殆遍久客京師公卿皆禮重之同
時薛銓字恒夫多見宋元名蹟能得其深處撫寫山水
巖壑雄厚不屑屑於平岡淺渚雜居市中流傳頗少聘
妻方氏名婉儀亦工詩風雅唱隨爲松江沈學子女弟
子曾序其半格詩

黃位字位五艾陵湖東高橋人先世習醫至位尤精其業預決死生十不爽一二辨陰陽虛實於疑似之間從張仲景傷寒百十三方外妙悟推闡又制七十二方往往以一劑獲神效俗有半仙之號求者絡繹相繼雖甚貧窶者亦應之不倦江都趙宰天爵有贈句云孺子亦知名下士仙人曾授枕中書蓋紀實也子兆萱郡廩生孫廷簡諸生

以上續志

黃紹垚字藕舟天性誠篤博覽羣書考訂鐘鼎彝器名畫古碑寓目能決真偽三遊京師儀徵兵部主事黃文燿投繯死紹垚經營含歛護喪以歸尚義之名滿都下

精於醫於近時醫家心折徐洄溪嘗屬疾夢洄溪爲之施鍼於肩醒而病瘥兩肩皆有黑印指紋云子龍驤字友鵬輕財重義鄉里稱長者姪龍祥字雲起幼績學困於小試從歙人羅浩遊臨證能別寒熱於疑似嘗謂人以元氣爲本治疾者求速愈而不顧元氣雖邀功一時而根本潛虧終成難治之證識者歎爲名言評校醫書得筆記若干卷

府續志

方奇字問之號偶荆醫名善昌世居邵伯埭精岐黃通經術著有修元大道三章計三卷傷寒析義四十卷百菊谿陳芝楣兩先生深重之先後序刊其書行於世并

有周易翼註四卷待梓

朱煜字滌溪邵埭人性純孝年十三喪母值歲饑自執炊爨以供父膳因從父業醫父好施屢空積欠纍纍父故後另立券與約至期悉如數償之其言行不苟類如此好讀書而於醫尤工道光十三年時疫盛行世醫習用陶氏六經治輒左煜獨用吳又可治溫疫法投劑輒應活人無算生平臨證無富貴貧賤靡不竭盡心力故治無弗應年六十二卒著有五經分類本草類方續選待刊子湛溪亦以醫名

劉成霖字潤時善書畫工傳真

王素字小梅工繪畫花卉鱗毛人物山水兼擅其長每作一幅極瀟灑出塵之致識者珍之年八十餘卒

許長增工醫性慷慨貧不取資富不計利所醫多神效著有痘疹形色論傷寒餘註待梓

徐嵩慶字小穀工詩畫子敬輝亦善畫尤工畫蝶嘗慕游浙省人以蝶仙呼之

夏慶之原名長發世居黃珏橋之夏家街慷慨好施精於醫學子廷松孫志潮克承先志曾孫繼昭亦以醫名著有疫喉淺論待刊

以上新增

增修甘泉縣志 卷十五
三

仙釋

華子期者淮南人也師角里先生受山隱靈寶方一曰
伊洛飛龜秩二曰白禹正機三曰平衡按合服之日以
還少一日行五百里能舉千觔一歲十易皮後得仙去

神仙通鑑

子主者不知何處人詣江都王自言甯先生雇我客作
二百餘年不得作真人以為狂王問先生居止云在龍
眉山上王遣吏上龍山巔果見先生毛身廣耳披髮鼓
瑟主見之叩頭吏致王命先生曰此主是我比舍九世
孫也汝勿預吾客事吏乃下山

增修甘泉縣志

卷十五

人物仙釋

一

三洞羣仙錄

按列傳載子主楚語蓋楚人也元伊世珍又載入嫗嬛記舊志遂列之爲元人誤矣

朱璜廣陵人少病瘦就睢山道士阮邱醫邱曰卿除腹中三尸有真人之業可度世也璜曰病愈當爲君作客三十年不還家邱與藥令日服九九百日服下如肝脾者數斗養數十日肥健心意開朗令讀黃庭經日三遍能通其意遂與入浮陽山玉女洞且八十年白髮盡黑鬢更長三尺餘

列仙傳

按本傳有贊曰朱璜寢瘕福祚相迎真人投藥三尸俱靈心虛神瑩贊幽冥毛頰髮黑

超然長生

廣陵茶姥者不知姓氏晉元帝渡江後耆舊相傳見之百餘年顏狀不改每持一器茗往市鬻之市人爭買自旦至暮所賣極多而器中茶未嘗減少刺史以冒法繫之獄姥乃持所賣茗器自牖中飛去

神仙通鑑

秀英丁義君之女嘗於揚州城西七十里煉丹得道有

丹井

文獻通考

史宗號麻衣道者常坐廣陵白土埭上引絳得直隨布施人江都令檀祇與語多無畔岸索紙賦詩曰有欲苦不足無欲卽無憂未若清虛者帶索被元裘浮游一州

間汎若不繫舟要當滅塵慮棲息老山邱祇異之後有
一狂道士一杖一箱逼暮詣海鹽令借人隨從選一牧
鴨小兒形服最醜者將去倏忽登一小山山有屋屋有
道人三四輩相勞苦其言小兒一不能解但得食一甌
如飴向暝道士欲辭去屋內人問道士曰君知史宗所
在否其謫何時竟答曰在廣陵白土埭計其謫行當竟
矣屋內人便作書授小兒曰爲達之繫小兒衣帶上令
還海鹽令喜問曰衣中何有曰書疏耳又呼問小兒至
何處小兒曰爲前道士捉杖飄然去但聞足下波浪聲
至一山中山中人寄書與白土埭上卽引衣帶示令令

不能曉小兒歸詣史宗宗驚曰汝乃蓬萊島中來耶三洞

羣仙錄

按三洞羣仙錄引冷齋夜話有此而高僧傳亦載入蓋因陶淵明記云白埭逢三異比邱其一語然其事迹仙也非釋也今正之

府志興化縣亦載史宗白土埭事江都舊志載白土埭在今府西十八里則其地實在甘泉矣況江都令檀祇與之語則非興化更明裴謏昔與王敬伯梁芳爲方外交入山學道梁芳死敬伯調官至正元中奉使淮南邂逅裴謏維舟慰問汝何

所須諶曰吾儕野人心近雲鶴廣陵之西卽吾之宅也
倏然鼓櫂而去敬伯詣宅見諶衣冠偉然設宴就坐諶
酒酣謂左右曰此人乃我昔山中之友道心不固將浮
沉於生死海中求崖未得今日之嘉會誠難得也予其
往矣

三洞羣仙錄
引太平廣記

維揚十友者家並富足拉爲道友遞以酒食爲娛嘗有
一叟敝衣藍縷造席眾亦不拒一日酒酣謂眾曰某雖
貧欲具一會奉酣可乎眾皆唯明日乃延入一茅舍丐
者數輩環坐乃昇一巨板以油幕幕之揭視乃爛蒸小
兒眾皆惡不食叟曰此千歲人參也頗不易得欲以此

奉報既不食命也各自分食升天而去

同上

徐則在縉雲山學道晉王廣鎮揚州召之詣揚州請受
道法辭以時日不便其後夕中命侍者取火如平常朝
禮之儀至五更死支體柔弱如生停留數旬顏色不變
晉王遣使送還天台定葬自江都至天台在道多見則
徒步云得放還至其舊居取經書道法分遺弟子跨石
梁而去須臾柩至方知其靈化晉王聞而異之遣畫工
圖其狀貌令柳詵爲之讚

隋書隱逸傳

續志考正非揚產亦僅一至揚州

王遠知琅邪人徙江都母晝寢夢靈鳳集其身因而有

娠又聞腹中有啼聲沙門寶誌謂其父曇選曰生子當
爲神仙宗伯少聰敏博綜羣書初入茅山爲道士傳陶
宏景法後又事宗道先生臧兢隋煬帝爲晉王鎮揚州
招之入見時鬚髮忽變爲白少頃復黑王懼而遣之貞
觀九年敕州於茅山置大受觀降璽書其年謂弟子潘
師正吾見仙格以少有小累不得白日升天翌日沐浴
加冠裳焚香而寢遂卒年一百二十六遺命子紹業爾
六十五當見天子七十見女君調露二年紹業表其言
追諡升貞先生則天時改諡昇元先生唐書方伎傳
李珏廣陵江陽人也世業販糶而性迥端謹異於常輩

凡糶與糴皆授以升斗俾令自量不計時之貴賤升取
錢二文以資父母養而已後值李相珏節制淮南避同
姓名改寬珏下車數月修道齋次夜夢入洞府見景色
正春烟花爛熳翔鸞舞鶴彩雲瑞霞樓閣連延獨步其
下見石壁光瑩填金書列人名內有李珏字長二尺餘
以洞府列名自喜忽二童子從石壁左右出問此爲何
所童曰華陽洞天此姓名非相公也珏驚復問非珏乃
何人乎童曰此相公江陽部民也及曉徧訪府城內同
姓名者得李寬舊名珏乃以車迎之入府淨室齋沐兄
事之寬年六十時曾有道者教以胎息亦久不食珏愈

增修甘泉縣志 卷十五
加欽重問何道術服煉何藥願以相授寬辭以愚民不知固請乃告以胎息不食之事珏師其法後寬歷一百餘歲輕健異常一日忽告子孫曰吾寄世多年雖然養氣無益汝輩遂卒三日棺裂有聲視之衣帶不解如蟬脫焉已尸解矣

神仙通鑑

按唐沈份續神仙傳珏在隱化二十人之列李含光廣陵人生方晬日取孝經如捧讀狀及卯好靜處誦習墳典年十八志求道妙遂師同邑李先生遊藝數年神初以清行度爲道士居隆興觀尤精老莊周易之深趣開元十七年從司馬煉師於王屋山傳授大法

靈文金記元宗賜號竈靖先生詔居王屋山陽臺觀歲餘請居茅山纂修經法其合丹之處生靈芝八十一莖徵入紫庭別院懇辭告老御製詩序以餞之大厯己酉歲十一月十有四日頓化於茅山紫陽之別院春秋八十有七初陶隱居以三洞真法傳昇元先生昇元傳體元先生體元傳正一先生正一傳之先生皆總集妙門大真正法所以茅山爲天下道學之宗焉

顏魯公文集又見神仙通鑑

按元靖先生互見方伎

續志考正已見方技內

馮俊廣陵傭也多力而愚貞元初市遇一道士雇俊擔藥囊約百觔重行至六合登舟令俊伏舟底道士自引帆如行空中食頃呼出已廬山星子灣將登陸矣令俊負藥行五六里許至一大石扣之石分爲二其中有大石堂命捨擔謂左右曰擔夫饑可與之食乃出胡麻飯一器並漿爲食飲畢授錢千令繫腰下又與丹百餘粒曰日食一粒可百日不飢又令俊閉目騎一石道士從後鞭之須臾已在廣陵郭外眎腰下金錢也俊後遂富登上壽焉

康熙府志

劉白雲江都人也多陰德遇道士樂子長日子有仙籍

天骨而流浪塵土中何也因授以籙且告之曰子先得變化而後可授道白雲依而行之變化萬端行七百里再遇子長服丹千日上昇

列仙傳

按府縣志載白雲於襄州結紫雲幄化兵士數千人節度于頓疑其妖使兵馬使攻之白雲乘馬走漢水如履平地辰發靈州午已在湘潭七百里可與此傳相證

劉商彭城人擢進士第歷臺省爲郎中棄官訪道至廣陵城有道士賣藥於眾中見而異之攜登酒樓談秦漢間事皆如目覩及暮散去翌日商復於市訪之道士見

商愈喜復上酒樓劇談歡醉出一小藥囊贈商并吟曰
無事到揚州相攜上酒樓藥囊爲贈別千載更何求別
去累尋不復見商開囊取藥服之身輕舉爲地仙雲笈七籤
揚州老兵官莫敵自解名籍家居奉道多化人積善常
齋濟貧苦一日一道人過之問莫所學何道莫曰吾平
生懺悔殺人罪耳吾束髮從軍大小百戰殺人最多今
年七十三時見冤魂以爲恨道人曰死生一揆罪福本
空心以爲罪則罪狀自見心以爲無罪則惡相皆無冤
家形影皆自心生非實有也一念迴機其力最大乃引
莫臨水果見百餘人血身淋漓來莫左右莫驚泣哀求

道人一喝其冤魂悉皆散去仍以丹三粒與之曰服三
粒成天仙二粒成地仙一粒則爲地下主者莫得丹置
掌上一粒升空一粒墜地剩一粒服之道人曰分止此
耳拜問姓名以指畫空作呂字去莫自是絕烟火食知
人休咎歷年一百有三端坐而逝神仙通鑑

呂秀才者一日過廣陵妓黃鶯托宿以其藍縷垢汚而
拒之秀才題二詩于屏一曰嫫母西施共此身可憐老
少隔疎親他年鶴髮雞皮媪今日花顏玉貌人其二曰
花開花落兩悲歡花與人還共一般花在枝頭防客折
落來地下請誰看題畢不見蓋洞賓先生也黃悟抉目

同

新安聶師道宗微少事道士于方求發跡名山數見異人揚行密開府揚州宗微實輔佐之為國師三十年楊氏末解化而去弟子葬之舉棺惟衣履存焉

詩話總龜

劉海蟾初名操改名元英廣陵人第明經仕燕劉守光為相素喜黃老忽遇正陽子為演清靜無為之宗金液還丹之要辭燕適秦韜光隱晦遇尚書郎李觀語曰奉煩寄語養素先生藍方十月懷胎如何得出觀至南岳語方方驚曰吾養聖胎已成念非海蟾不足以成吾道是年方卒常訪陳希夷為方外友所至多有遺踪後白

氣從頂門出化鶴飛去元至元六年封明悟宏道真君

續文獻通考

淮東揚州進士傅鴻一生戒行供養真武三十餘年以應物甚妨道業乃棄家雲遊至終南山上清太平宮知宮張守真見其形貌清古留於本觀別治一室居年餘修奉上真香火虔敬恭恪一夕眾寢後守真叩鴻寮見火光一道從寮內迸出聞鴻睡中與人語明早問鴻鴻曰今當限至遂沐浴易衣升堂聽受真武真君托身降言令為我傳報宋天子云三月桃花景色天萬般真瑞一時妍金枝寶運從新令仲節當迎赤腳仙次日鴻遁

增修身果志 卷十五
去不知其踪守真以真武降言不敢隱晦上其事於陝西經畧使聞之朝其年果生太子以預報勝因就太平宮建真武寶閣及立鴻祠賜號勝因真人并給本人家屬銀絹一百疋兩

神仙通鑑

鄭搖鈴在京師持一銅鈴搖鳴闐闐間丐錢爲食用餘則分惠貧者宣和末來維揚搖鈴丐錢夜則寄宿逆旅久之謂主人曰吾將死所以隨身衣物悉置之棺焚之已而果死主人如其言昇棺出城舉者覺漸輕而聞鈴聲常在數十步外鈴聲漸遠則棺愈輕至焚所啟視之惟一竹杖而已

睽車志

廣陵有蔣生者死十四年尸猶溫軟其妻女閉門守之未嘗與鄰里通水火一日有書一封達其家視之乃生字跡也杜君懿實其事有贈君懿一詩曰仙翁棄妻子往爲壺中客玉棺竟未掩人世已成昔白雲無回期三徑滅遺跡猶傳有青鳥往往寄消息

公是先生集

鄧齊賢廣陵人有道術習瓊瑤玉蟾君致雷法自號心雷河東張仲舉承旨趙郡蘇昌齡編修爲之記

翠屏集

張紫陽天台人浪跡雲水遇一僧能入定出神數百里間頃刻輒到紫陽曰禪師今日能與同遊遠方乎僧曰可也紫陽曰惟命是聽僧曰願同往揚州觀瓊花於是

增修甘泉縣志 卷十五
紫陽與僧靜處一室相對瞑目趺坐皆出神遊紫陽纔至其地而僧先至蓮花三匝紫陽曰今日與禪師各折一花爲記僧與紫陽各折一花歸少頃二人欠伸而覺紫陽云禪師瓊花何在僧袖手皆空紫陽拈出瓊花與僧笑玩後弟子問曰彼禪師者與吾師同此神遊何以有折花之異紫陽曰我金丹大道性命兼修故聚則成形散則成氣所至之地眞神見形謂之陽神彼直修性宗不復修命故所至之地人見無復形影謂之陰神弟子曰唯 神仙通鑑

按列仙世代年月具載各傳而不冠以某朝

以其爲仙則可歷終古難定以世數也至漢時后土祠住持道士金大貴著有姓氏宋有瓊花觀道士金大甯金丙瑞二人培護瓊花俱不可泯并附見其姓氏焉

佛馱跋陀羅甘露飯王之苗裔與羅什相見什有所疑多就咨決東晉義熙十四年於謝司空寺譯華嚴六十卷寺前池內有二童子從池內出捧香散花 翻譯名義

按東林蓮社十八高賢傳稱尊者譯經不著其地而翻譯名義云在謝司空寺寺即今天甯寺謝安石之故墅也二青衣從池出嘉靖

維揚志云兩青蛇從井出微有不同志稱尊者譯經後遁去不知所之而高賢傳稱尊者

塔在廬山北嶺

曇詵廣陵人幼從遠公出家勤修淨業兼善講說注維摩經行世嘗著窮通論以明宿修述蓮社錄以記往生又能別識鳥獸毛色俊鈍之性洞曉草木枝幹甘苦之味妙盡其理元嘉十七年集眾謂曰自建寺以來至此五十年吾之西行最在其後即跏趺念佛百聲閉息遂絕春秋八十

東林蓮社十八高賢傳

惠休善屬文辭采綺豔徐湛之為南兗州刺史與之甚

厚孝武命還俗姓湯任揚州從事

宋史

法莊俗姓申淮南人十歲出家廬山為遠公弟子少以苦行著晚遊關中從叡公學元嘉初出都止道場寺誦大涅槃法華淨名諸經比舍常聞有兵仗羽衛聲蓋天神來聽也宋大明初卒於寺年七十六

高僧傳

慧慶廣陵人出家廬山學通經律清潔有戒行每夜誦法華十地思益維摩經聞闍中有彈指讚歎聲嘗於小雷江中遇風船將覆慶誦經不輟覺船在浪中有人牽之者倏忽至岸宋元嘉末卒年六十三

高僧傳

道儒姓石氏渤海人寓居廣陵少懷清信慕出家宋臨

川王義慶鎮南兖州贊成之蔬食讀誦所至勸人改惡
修善遂成導師元嘉末出都止建初寺長沙王請爲戒
師盧丞相等共買張敬兒故宅爲立寺今齊福寺也齊
永明八年歿年八十一

同上

慧益廣陵人隨師在都下竹林寺精勤苦行誓欲燒身
大明四年始卻粒惟餌麻麥食油酥未幾又斷油酥食
香丸孝武遣江夏王義恭詣寺請益益誓志無改七年
四月八日乃於鍾山之南置鑊辦油乘牛車之山就焚
帝駕親臨諸王后妃道俗士庶填滿山谷益入鑊據一
小胡床以吉貝自纏加一長帽以油灌之將著火帝命

太宰諭止之益志愈確乃手自執燭然帽帽然已合掌
誦藥王品火至眉誦聲猶分明及眼乃昧觀者莫不彈
指稱佛帝聞空中笳管異香芬苾詔於燒身處起藥王
寺焉

同上

道達俗姓裴聞喜人住廣陵永福精舍少以孝行著拯
濟危險道潤江濱梁永明中爲南兖州僧正廉潔有治
才報罷後惟故紙五束

續高僧傳

惠命廣陵人住安樂寺開濟篤業崇以成實見知

同上

慧布姓郝氏廣陵人少懷遠操年二十一剃落入揚都
從建初寺瓊法師學成實論又從攝山止觀寺詮法師

聽開三論洞達清元時號爲得意布亦曰思元布後于
大品善達章中悟解大乘陳至德中帝與諸王并受其
戒奉之如佛貞明元年十一月二十三日端坐而化未
化前大地連動七日化後移屍就林山地又動太史奏
曰得道人星滅矣有望見旛花滿寺光明騰焰者不測
其故入山視之乃布公去世

同上

法侃滎陽鄭氏子弱年從道志力堅明初依泰山靈巖
繼從前達法師後南渡江陰栖遲建業陳平後乃北止
江都安樂寺有曹毘者清信士也明解攝論真諦親承
侃覆敘所聞侃每於隱義發明鋪示旣允愜當毘合掌

稱善

同上

智錡姓夏侯氏豫章人少出家揚州興皇寺聽朗公講
三論善受元文隋開皇十五年遇天台顓公修習禪法
特有願力顓歎重之晚講涅槃法華及十誦律又善文
筆史籍後至廬山造大林精舍隋文帝召之不往歿年
七十有八

同上

慧海姓張氏武城人少年入道師鄴都罔法師更從青
州道猷法師以周大象二年來儀濤浦創居安樂修葺
伽藍起建重閣常以淨土爲期專精致感有齊州僧道
詮賚畫無量壽像來云是天竺雞頭摩寺五通菩薩乘

空往彼安樂世界圖寫真像冥會素情深懷禮懺乃神
光照爍於是模寫懇苦願生彼土以隋大業五年五月
旦伸手五指用表終期至五日夜欬然而起依常面西
禮竟趺坐至曉方逝春秋六十有九卽以其月九日琢
石於寺鐫爲巨室而移坐焉江都令辛孝凱躬自指攜
弟子慧昞以全身處架塔築基建碑旌德秘書學士王
春爲之文

同上

慧璉姓吳氏江都人七歲依榮法師出家隋仁壽中從
榮被召住禪定寺大業末郊壘多虞寺眾推璉善能禦
敵乃總集諸處人畜在昆池一莊多設戰樓用以防禦

時司竹羣賊鼓行郊野無抗拒者兵臨莊次璉登樓一
望見張旗十里乃收束弓刀反縛奴僕大設餽饌廣開
倉廩身先入陣勞問軍主引至莊中命令就坐旣見盛
設相與開顏飽噉而去惟取牛十頭擬勞軍牽至中途
璉後從乞還之所以義甯之初通莊並潰禪定如舊無
損唐貞觀初住雲華寺又徵入普光八年冬終于彼寺

同上

智聰住揚州白馬寺後住止觀寺專聽三論陳平後渡
江住揚州安樂寺大業之亂思歸無計隱江荻中誦法
華經七日不飢恒有四虎遶之聰曰吾命須臾卿須可

增修身果志 卷十五
食虎曰造天立地無有此理忽一公年可八十榜舟而
至曰師欲渡江棲霞住者可即上船四虎一時目中淚
出聰曰救危拔難正在今日可迎四虎於是利涉往達
南岸船及老人不知所在聰領四虎同至棲霞舍利塔
西經行坐禪誓不寢臥眾徒八十咸不出院若有凶事
一虎入寺大聲告眾以為式唐貞觀二十三年四月八
日小食訖往止觀寺禮大師影像執爐徧禮又往興皇
墓所禮拜還歸安坐而卒異香充溢哀動山林時年九
十有九同社里氏東晉氏又縣及對大壩論開
法喜南海人形容短陋年可四十許蠻蜒間相傳已三

百餘歲其自言亦云舊識廬山遠法師及晉宋間事歷
歷如信宿平素悄然見人必語語必含深意吉凶之徵
有如影響大業二年煬帝幸江都迎之至揚子宮常於
宮中環走索羊頭帝聞惡之敕鎖著一室俄而三衛人
見其遊行於市還奏敕所司復驗禁閉之處門鎖如故
守門者曰喜現在室中開戶見袈裟一聚白骨其鎖貫
項骨不脫帝愕然敕令勿輕搖蕩曰聖者神變無方至
暮喜還在室或言或笑守者復奏帝令脫鎖縱其所適
或一日赴數家齋或時飲酒啖肉俄而有疾自撒所臥
床薦襯簣鼓腹令人於其下鋪炭然之半身焦爛而歿

葬於香山寺側後四年南海郡奏喜見還在郡敕遣開棺空無所有

宋高僧傳

曇璿江都人少學成實兼諸經論涅槃小品每往法筵亟陳論決徵據文旨學者憚焉煬帝爲晉王造寺京室延璿入住仁壽末敕送舍利子於熙州環公山山谷寺璿卽其地擬構塔基其處屢放金光如一疋許而舍利恰到先不相謀若同其契後住宏善寺終

同上

住力姓褚氏陽翟人避地吳郡之錢塘縣出家器宇凝峻虛懷接悟陳宣帝於京城造泰皇寺敕監百工至德二年又敕爲寺主陳亡負錫遊方訪求勝地行至江都

止長樂寺焉隋開皇十三年建塔五層金盤景耀十七年煬帝鎮廣陵以力爲寺主接奉丹陽龍光寺優填王像及王謐所得定光像於長樂供養特建二閣并夾二樓神工宏壯大業四年又起四周僧房廊廡十年以旃檀香木模寫瑞像并二菩薩同安閣內十四年江都之亂道俗流亡誓以身命守護殿閣唐武德六年輔公祐作亂凡百寺觀欲撤送江南力願燒身留寺遂於十月八日香湯沐浴跣面西引火自焚於佛前年八十羣鵲哀鳴右繞七匝而去師歿後像遂南遷而殿閣得免煨燼東宮庶子虞世南爲碑記

同上

道慶姓戴氏其先廣陵人後遷無錫年十一出家事吳郡建善寺藏閣黎十七入都聽彭城寺講成實論大義餘論皆莫之遺陳祚旣終東歸無錫居鳳光寺後止毘檀宏業寺專事闡揚無棄寒暑又善應物交遊毫翰奔涌琴詩婉妙以唐武德九年八月示寂窆於扶塘之山入壙之日有白鶴一羣自天而下搖曳迴翔摧藏哀唳

沙門法宣銘之

同上

靈坦姓武氏則天太后姪孫也母夢神僧授與寶鑑而生七歲誦習畢通應童子舉十三從宦至太子通事舍人而誓入空門從洛都盛化荷澤寺神會禪師天寶初

載召坦曰吾有一句是祖祖相傳至曹溪曹溪付吾汝諦受之遂遊方而去坦亦向廬州大厯五年聞南忠國師應詔入都往禮覲之八年欲出關忠奏坦是神會弟子敕賜號曰大悲兼齋墨敕行化至六合方歎大法陵夷忽聞空中有聲曰開心地卽見菩薩如文殊像曰與汝卽驗令舉項以掌按之尋見有四指赤痕其印迹恒現又止金山消北面龍穴毒氣又在江陰定山結庵有二白龜白蛇受戒又往吳興林山造一蘭若有金紫三丈夫同來稱歎元和五年相國李鄘召居廣陵華林寺寺有張遼墓多鬼物惑亂坦居之寂然居人向所患山

妖木怪坦一一過禦之至十年忽見龜茲國二胡人來
請和尚演教十一年五月十三日預告眾曰吾赴遠請
七月示寂九月將滅至季秋八日果寂遷塔於揚州西
馴翟方之南岡報齡一百八歲僧臘八十四蓋曹溪之
孫荷澤之子也

宋高僧傳

鑒真姓淳于氏廣陵江陽縣人幼隨父入大雲寺見佛
像感動夙心因求出家在智滿禪師下天后長安元年
配住本寺寺後改名龍興神龍元年從道岸律師受菩
薩戒景龍元年詣長安二年于實際寺依荊州恒景律
師歷經明師陶誘動必研幾會無矜伐比旋淮海以戒

律化誘鬱爲宗首時日本國有沙門榮叡普照等東來
募法開元年中達於揚州問禮真足乃於天寶二載六
月同比邱思託等十四人買舟自廣陵賫經律法離岸
至越州浦出洋風濤甚惡舟人顧其垂沒有投棄棧香
木者聞空中有聲曰勿投棄見輓轡各有神將介甲操
伏焉尋時風定相次達於日本其國王歡喜迎入城大
寺安止初於盧遮那殿前立壇爲國王受菩薩戒次夫
人王子等次本土有德沙門足滿十員度沙彌澄修等
四百人用白四羯磨法爲彼國傳戒律之始祖以彼國
天平寶字七年五月五日無疾辭眾坐化身不傾壞爲

唐代宗廣德元年也至今其身不施苾漆國王貴人信士時以寶香塗之僧思托著有東征傳

同上

法慎姓郭氏江都人少從瑤臺成律師受戒具依太原寺東塔體解律文聲振京師諸寺眾請綱領遂東歸揚都署不攝齋食不求飽居不易坐四方施捨一歸大眾及再至京國有黃門侍郎盧藏用虔奉之朝士陸象先畢構陸餘慶嚴挺之崔希逸房琯崔渙李澄詩人王昌齡綦毋潛輩皆與交接天寶七載十月十四日晨興盥漱就胡床跏趺既曛而滅於龍興寺別院塔於蕪城西蜀岡之原上首幽公請吏部員外郎趙郡李華撰碑文

大理司直張從中書趙郡李陽冰題額

同上

法海字文允姓張氏丹陽人少出家於鶴林寺周覽羣經該通外學六籍嘗謂人曰佛法一門極惟心地餘皆椎輪也天寶中與揚州法慎律師講肄同曇一靈一等推爲顏冉復與杼山畫公爲忘形之交林下之遊緇白二徒多從求益焉

同上

崇演姓段氏東平人初出龍興慧超法師之門繼得嵩陽善寂禪師示心法居都梁山四方景附相國李紳鎮揚州少所接與聞其名遣人傳意召演入府酬對詣理談論鏗然特加歸信請主慧照寺化導聽法者千眾開

成二年終于淨院以十月二十三日全身入塔云

同上

廣陵大師者不言法名維揚人也形質寢陋性桀黠嗜酒啖肉常衣繡裘盛暑不覺脫蚤蝨聚其上僑寓孝感寺獨一室每夕闔扉而寢或狂悖性發則屠犬彘日與惡少鬪毆或醉臥道傍或與人賭博或剽奪人錢帛市人皆惡之而畏其勇莫敢與拒一耆年僧召大師誠勅之大師怒對之曰蠅蚋徒喋羶羶安知鷗鵠之志乎我道非爾所知也我清中混外者豈同爾齷齪無大度乎耆年不能屈一日自外歸入室閉戶有自戶隙覘見大師坐席放神光自眉間晃朗照物洞然驚報寺僧皆

來瞻禮明晨開戶則瞑目如入定已長往矣自此廣陵人寫貌供養號之爲大師焉

同上

省躬睦州桐廬人爲童強識忽投聖德寺從師得度復得姑蘇開元道恒師指授時有擊論互指爲迷者必請見躬爲判之晚赴維揚廣爲講訓所著有順正記十卷復通儒學作碑記以其曾化邗溝故呼爲淮南記主自稱冷山沙門焉

同上

靈一姓吳氏廣陵人九歲出家十三斷髮嚴持律儀將紹法寶示人文學以誘世初不計身中有我我中有身德充報圓緣斷相滅寶應元年十月十六日終於杭州

龍興寺年三十有五所著有法性論平日與天台潘志清襄陽朱放南陽張繼安定皇甫會范陽張南史吳郡陸迅東海徐嶷景陵陸鴻漸輩為塵外之交詩行于世

文苑英華

懷信居廣陵會昌三年癸亥歲武宗為趙歸真排毀釋門有淮南詞客劉隱之遊四明夢泛海見一塔東度是淮南棲靈寺塔塔第三層有信凭闌與之語且曰慙送塔過東海旬日當還數日隱之歸揚州即往謁信信曰記得海上相見時否隱之了然省悟後數日塔災獨遺旁一草舍 宋高僧傳

從審幼入江都禪智寺捨家誦經數萬餘言咸通五年受戒具於燕臺奉福寺後併三衣成五衲徧覽名山勝概晚歸淮甸推為僧首貞明二年三月十九日偶中微疾而終顏貌如常茶毘獲舍利三十粒 同上
舉直唐懿宗子也出家遊方至揚州詔以太平倉基地為鎮國禪院居之歿於院側立浮圖五級葬之宋元豐末發柩全骨鈎聯不解舍利發光著異焉 嘉靖維揚志
智具姓柳氏揚州人南嶽下三世章敬暉禪師之法嗣初謁章敬問何所而至師曰至無所至來無所來敬雖默然師亦自悟偈曰心本絕塵何用洗身中無病豈求

醫欲知是佛是身處明鑑高懸未照時住福州龜山咸
通六年終諡歸寂禪師 續文獻通考

太原孚上座初在揚州光孝寺講涅槃經有禪者阻雪
聽講至三因佛性三德法身廣談法身妙理禪者失笑
講罷請教禪者禪者教以輟講旬日掩關端坐收心攝
念師一依所教從初夜至五更聞鼓角聲忽然契悟遂
罷講徧歷諸方登住山法會又至閩中謁雪峰和尚俱
有深契後歸揚州為陳尚書供養一日謂尚書曰來日
講一徧大涅槃經作報荅屆期升座良久揮尺一下曰
如是我聞尚書應諾師曰一時佛在便乃脫去 補高僧傳

慧覺南嶽下四世趙州驗禪師之法嗣住揚州光孝院

續文獻通考

豐化和尚青原下六世雲居膺禪師之法嗣住揚州豐

化院 同上

令崇舒州人青原下七世雲居岳禪師之法嗣住揚州

豐化院 同上

原禪師姑蘇夏氏子青原下十三世雲白禪師之法嗣

住揚州建隆寺 同上

齊密首座本郡人南嶽下十四世黃龍新禪師之法嗣

同上

宣秘禮禪師南嶽下明詔慧禪師之法嗣住揚州石塔院同上

道暉和尚宋建隆元年勅立建隆禪院賜田千頃命為住持同上

昭慶禪師南嶽下十二世黃龍能禪師之法嗣住揚州建隆院同上

贊甯有文學洞古博物著書數百卷宋太祖禮之王禹偁輩常就之質疑柳開守維揚贈之詩有空門今日見張華之句所著筭譜尤傳于世嘉靖維揚志
來峯泰維揚雍熙寺主僧也所著有禪林類聚釋永甯

曰此古人糟粕耳檢點何為續文獻通考

志如揚州普門庵僧元至大二年置田若干畝至順間建佛殿塑諸天法像元統三年築三塔於永貞鄉學者踵來待之未嘗厭倦又制為規訓以傳於後危素悅學齋集

道彝字天倫揚州天甯寺僧戒行精專博通內典與明初少師姚廣孝相友善永樂中奉使日本卒於其國臨終作偈曰來不為多去不為少六十六年一了便了嘉靖

維揚志 德音號海潮揚州建隆寺僧精數學同上

按德音事蹟詳方伎門

法衡字秋巖居天甯寺能詩有竹西齋稿

明詩綜

智觀字止先又字蔚然江都人能詩有中峯草

同上

以上原志

唐

幼章唐相國夏侯孜之猶子大中初伯父司空出鎮廣陵師方七歲游惠照寺聞誦法華志求出家伯父初不允師絕飲食不得已而許之師慧遠禪師天祐三年錢尚父建瑞龍院迎請開法

南唐

慧覺禪師住揚州光孝院嘗問相國宋齊邱曰還會道

麼宋曰若是道也著不得師曰是有著不得是無著不得宋曰總不恁麼師曰著不得底聾宋無對

宋

慧誠禪師住廬山歸宗寺揚州人青原下十世報恩安

禪師之法嗣

明

睿略簡禪師蘇人洪武閒住持天甯寺有道行能詩姚道衍銘其墓

國朝

上悟字雪蒼俗姓姜本江都學生後為僧結廬黃珏橋

北之竹墩名曰沙香洲工詩多奇氣與范石湖等相唱和
和有既上人詩一卷 續志葺補

方外附

按前志有仙釋仙何可易言為更列一目

宗森字品木浙海寧張氏子八歲舍家受具戒於西湖之昭慶行脚遍參雍正間至京師值開藏經館遴選海內三宗高僧遂獲與焉先是會受付屬於石塔寺主既竣事求龍藏供奉石塔歸為華山首座尋主建隆時寺圯無完堵開法重興歛商黃晟感異夢鼎建乾隆辛未告成為建隆常住中興其後有恆一字夢因恬淡能詩

賜紫勅

亦海寧人本善長下西武人持戒嚴密
明彰字倬雲號紫松杭人披剃後至都以高行選入藏經館雍正甲寅

有山房敝帚集其陳叢林便宜疏尤切中僧徒流弊

湛性 又作 字藥根丹徒徐氏子出家住祇園菴工詩善

書手鐫圖書尤精妙一時名公卿禮重之直督方宮保邀主保定之青蓮禪舍學士李廉衣為作傳有雙樹軒詩鈔一卷桂林胡書巢太守重刊之

道存字石莊上元人披剃於江寧之承恩寺嘗主淮陰

湛真方丈住持湖上之桃花菴工畫善吹洞簫菴多士大夫之游以文翰相酬接咸禮重之汪履之董公祠道士也性恬淡有氣節德州盧雅兩為兩淮運使以奕見知未幾盧有塞外之行履之慨然請往終三年同歸盧有詩贈之後為甘肅主簿

以上續志

昌立號小支儀徵人住高旻寺數載豁然穎悟能詩道光年間住持建隆寺問樵和尚傳衣鉢為方丈戒律清嚴著建隆寺志略六卷圓寂後火化得堅固子十數粒圓明號秋水道光丁酉戊戌間住持新菴清修梵行工

詩得禪理於梵經多所銓解常閉門禮懺數日不食宣講華嚴十地人皆以為異聞近行脚入峨嵋矣

管本厚字吟松世家子住持邵伯九松道院清修有年工琴書位置花草得雅人深致道光乙巳阮文達公過其地嘗顏其居曰別有綠天辛丑壬寅間募修殿閣煥然一新劉文淇有重修玉皇閣記

甘棠小志

月修住持邵伯多寶院與如臯枕石風雨聯吟有閉門石半夜擁被月三更之譽里中徐春泉中翰王燦英茂才史牧邨徵士周鹿坪明經與結社焉其徒天來善蒔花雅量高致亦不替宗風云

同上

